

মানময়ী বয়েজ্ স্কুল

(নাটক)

মানময়ী বয়েজ্ স্কুল

প্রসাদ ভট্টাচার্য্য

ডি. এম. লাইব্রেরী
৪২, কর্ণওয়ালিস স্ট্রীট,
কলিকাতা

প্রকাশক :

শ্রীগোপালদাস মজুমদার

ডি. এম. লাইব্রেরী

৯২, কর্ণওয়ালিস স্ট্রিট,

কলিকাতা

২২৭৩

বার আনা

(এই নাটকখানি লেখা হয়েছে জুলাই ১৯৩৫ সালে।

প্রিন্টার - শ্রীগোবিন্দ মণ্ডল
আলেকজান্দ্রা প্রিন্টিং ওয়ার্কস্
• ২৭, কলকাতা স্ট্রিট, কলিকাতা •

মানময়ী বয়েজ্ স্কুল

—চরিত্র—

লামোদর চৌধুরী	...	বাব্বাচ্চাটির জমিদার
মানময়ী	...	জমিদার পত্নী
চপলা	...	জমিদার কণ্ঠ্য
রাজেন	...	স্কুলের সেক্রেটারী
মানস	...	গার্লস্ স্কুলের শিক্ষক
নীহারিকা	...	শিক্ষকের স্ত্রী
অশেষ	...	বেকার যুবক
হুধীর	...	অশেষের বন্ধু

কানাই, হারু, খটমট, বামী, তিলক,

রাজুর মা, ঝুলন প্রভৃতি

উৎসর্গ

আমার দাদা

৳রবীন্দ্রনাথ মৈত্রেয়

পবিত্র স্মৃতি-তর্পণে,

প্রসাদ ভট্টাচার্য্য

কোলকাতা

আগষ্ট, ১৯৩৫

সেই চাঞ্চল্যকর উপগ্রাস দু'খানি

এই

লেখকের লেখা—

১। বাস্তবের দু'পৃষ্ঠা— ১৥০

২। 'যে ফুল না ফুটিতে'—১৮

মানমরী বয়েজ্ স্কুল

প্রথম দৃশ্য

প্রথম দৃশ্য

দামোদর চৌধুরীর ড্রিং-রুম : রাজেন একা বসে শুচ্ছের কাগজ-পত্র নাড়াচাড়া করছিল ; সামনের টেবিলে পুরুতপ্রমানে কাগজ-পত্র, ফাইল, দৈনিক ছুটার পান্না সংবাদ-পত্র ; সামনের খোলা একটা জানলা দিয়ে বাগানের ও বাগান-বাটীর সম্পূর্ণ দৃশ্য পাওয়া যাচ্ছে ।]

রাজেন। ঐ যে কী একটা যথার্থ প্রবাদ আছে না—বারো বছর মাষ্টারী করলে যথার্থ কোর্টে আর সাক্ষী নেয়া না ওটা সত্যি—কিন্তু একটা লেজুড় দিতে ওরা ভুলেছে—মেয়েদের ইস্কুলে সেক্রেটারিগিরি করলে যথার্থ তাকে তখন আর ছারপোকা কামড়ায় না—সে নিজেই তখন যথার্থ একটা ছারপোকার ডিপো হয়ে যায়—! নাঃ—আর পারিনে—মাথাটা যেন কেমন কেমন করছে ! একটা—(বিড়ি একটা ধরিয়ে নিলো—একবার ধোঁয়া ছাড়লো—

কিছু নাক দিয়ে, কিছু মুখ দিয়ে)—আঃ— ! কী জিনিস !
একটা যেন মৃতসঞ্জীবনী সূধা ! সেকালে—এই যে ? কী
খবর বথার্থ—

(খটমট সিংএর প্রবেশ)

খটমট । দিদিমণিকে খুঁজতে আছি ; তিনি হাছেন ?

রাজেন । কেন ? বথার্থ তাকে এই সকালে—কে ডাকে ?
কর্তা-মা— ?

খটমট । নাহি, মাষ্টার সাহেব তাঁকে ডাক্তা—আছে । তিনি
হাছেন ইখানে সিক্রিটারি বাবু ?

রাজেন । হাঁ—বথার্থ হাছেন ! এই আমার ট্যাঁকে আছেন !
দেখগা এতক্ষণ বথার্থ পৌছে গেছেন শিব-মন্দিরে !

(খটমট প্রস্থানোত্তম)

আচ্ছা সিংজি—শোন একবার এদিকে !—এই নাও
বিড়ি খাও দিকি, আচ্ছা দেখো,—একটা কথা—(একটু
কেশে নিলো, দরজার দিকে একবার তাকিয়ে—)

এই একটু উপকার করতে পারেগা, তোমাকে আমি
কর্তাবাবুকে বলে মাইনে দেড়া বাড়িয়ে দেগা—বথার্থ
একটু সামান্য উপকার—থোড়া !

(খটমটের গৌফের ফাঁক দিয়ে একটুক্করো হাসি
রাজেনের গায়ে ছিটকে পড়লো ।)

পারেনা—না ?—এখন এই টাকাটা লেও— ! এটা
যথার্থ আপাততঃকা বক্শিশ্ ! (সিং সেটাকে পাগুড়ীর
এক কোণে গুঁজে রাখলো)

খটমট । কেয়া হুজুর ! আপ্কা ওয়াস্তে—


রাজেন । সে কী আমি জান্তা নেই—তুমি আমাকে যথার্থ
কতো ভালবাস্তা হয়—ঠা, তা ছাখে—(দরজার দিকে
তাকিয়ে) এই একটু এবাড়ীর দিদিমণিকে চোখে চোখে
রাখেগা—অর্থাৎ মাষ্টারের সঙ্গে কী অভিসন্ধি লেকে ঘুরত
হায়—কোন কিছু সন্দেহজনক কাজ করতী হায় কি নী ?
—বুঝতে পারা হাম্কে, যথার্থ বলবার অর্থ—আর—

খটমট । তোবা, তোবা ! বাচ্চা মাই হাম্মার দেবী হাছে—হামি
উসব পারিবে না—

রাজেন । দেবী হাছে ! তোমার চোদ্দপুরুষের দেবী হাছে,
একেবারে সতীর দ্বিতীয় সস্তা সংস্করণ আছে ! নাঃ—মেয়ে-
জাতকে নিয়ে আর যথার্থ পারা গেল না, পুরুষ দেখলেই
যেন ফেপে যায়—আর ঐ মাষ্টার ব্যাটা—যথার্থ যেন
রাস্তার কুকুর—ভেবেছিলাম যথার্থ বাঁচালে—নাঃ—হুদিস
পাওয়া—যথার্থ—কে— ? তিলক— ! যথার্থ একটু শোন
এদিকে—বিশেষ কাজ—

(তিলকের প্রবেশ)

তিলক । কী বাবু !



রাজেন। দেখো—দৌড়ে যাও দেখি মাষ্টারের বাড়ী—বুঝলে
 যথার্থ! গিয়ে দিদিমণিকে—এই বাড়ীর দিদিমণিকে—
 একবার চট করে ডেকে দাও দেখি—বল কর্তাবাবু একুনি
 একবার ডাকছেন—একুনি—একুনি! বুঝলে!—দৌড়ে
 যাও—এই একটা বিড়ি নাও—খেও।

তিলক। আচ্ছা বাবু!

(প্রস্থান) *


রাজেন। একটা সামলাতেই প্রাণ যথার্থ ওষ্ঠাগত—আবার দুটো।
 এবারই কৈ ভাজা হতে হবে, ইচ্ছে হয় দিই ছেড়ে-ছুড়ে
 সব, যাই টলে সদরে, যথার্থ চোখের ওপর না দেখলে—
 কিন্তু প্রাণটার মধ্যে যেন কেমন টন্ টন্ করে ওঠে—কেষ্ট
 ছাড়া কী—যথার্থ—! কর্তার বাহাত্মুরেতে পরেছে যথার্থ
 এই পঞ্চান বছর বয়সেই! আবার আর একটা ইঙ্কল!
 অতোগুলো ছেলে নিয়ে কাণ্ড—এতো একটার সঙ্গে তবুও
 যুঝেছিলাম,—কিন্তু এতোগুলো—! তার আজকালকার
 ছেলে—পেট থেকে পড়েই যথার্থ মেয়ে দেখে জিব দিয়ে
 জল পড়ে,—যথার্থ কুশিক্ষা,—আধুনিক—

(নেপথ্যে) বাবা, আমায় ডাকছিলে—কেন বাবা—আমি
 যে মেশোর সঙ্গে—

(চপলার প্রবেশ)

রাজেন। হঁ—মেশো—! যথার্থ রক্তচোষা মশা!

চপলা (ঘরে ঢুকে) রাজুদা—বাবা কৈ—আমাকে ডাকছিলেন?



প্রথম অঙ্ক

৫

আমার ক্যারম্ খেলাটা মাটা হ'লো—তাড়াতাড়িতে
queenটা মেশো pocket করলো—কোথায় বাবা—
রাজুদা? ওপরে? যাই—

রাজেন। চপল—তুমি এসেছ চপল?—

চপলা। আবার অমনি করে চেয়ে আছেন—আমার সত্যি হাসি
পায়—যেন পাগল, যাই বাবাকে খুঁজে দেখি—

রাজেন। চপল—শোন শোন বথার্থ বেও না—কর্তাবাবু এই
একুনি পায়খানায় গেলেন—তোমাকে একটু বসতে বলে
গেছেন—

চপলা। পায়খানায়—তবেই হয়েছে—কাগজ নিয়ে গিয়েছেন
নাকি—তবেত ঝাড়া—ঝাড়া ঠিকবণ্টা—ওদিকে মেশো
queenটা—

রাজেন। তোমার মেশো বথার্থ অগ্নের queen-এর ওপর বড়
চোখ দেয়—আমার queenটাও—

চপলা। হেরেছিলেন—ত? মেশোয়কে কেউ হারাতে পারে
না—যে টিপ—ঠিক লাগে—

রাজেন। ঠিক বলেছ—ভীষণ টিপ, ঠিক লেগে যায়—ঐ তো
ভয়! তা তুমি বথার্থ বসো না!

[চপল একটা সোফায় বসলো—রাজেন নিজের চেয়ারটা টেনে নিয়ে
পাশে বসলো একটু দূরে। হাওয়ায় চপলার খোলা চুল থেকে কয়েকটা
চুল উড়ে এসে রাজেনের গায়ে পড়লো—রাজেন চট করে হ'গাছা চুল তুলে
নিয়ে একটা চুমু খেলো—নিমেষে, নিঃশব্দে।]

চপলা। (হেসে ফেলে) ওকী করেন! আপনি হাসালেন—

হাসালেন রাজুদা, পাগল হলেন নাকি—

রাজেন। পাগল! বথার্থ তুমিই আমায় পাগল করবে—হ্যাঁ

তোমার চুলগুলো শুঁকছিলাম—কী তেল মাখো—চপল—

চুল তো নয়, যেন একঝাড় কালো মল্লিকা—

চপলা। আচ্ছা রাজুদা, বাবা নাকি আর একটা ইস্কুল খুলছে—

ছেলেদের, বেশ হবে কিন্তু তাহ'লে, না? দেখবো কোন্
ইস্কুল বেশী—

রাজেন। (স্বর্ণত) ছেলের নামে জিবে জল আসে—কেন আমি

কী—! কী মেয়ে রে বাবা! গেঁয়ো যোগি—

চপলা। কী, চুপ কণ্ঠে চেয়ে রইলেন যে—আচ্ছা আমার মুখে

কী আছে যে অমন কোরে—গ্রহণ লেগেছে?

রাজেন। গ্রহণ? বথার্থ তাই! তোমার মেশোর ছায়া পড়ে—

আচ্ছা চপল—তুমি আমাদের বাড়ী আর যাও না কেন?

—মা নারকেলের নাড়ু করে—(পকেট হাতড়িয়ে) এই

তোমার জন্তু নিয়ে এসেছি, খাও না চপল—আচ্ছা তুমি

হাঁ করো আমি টপ্ করে—


চপলা। (হেসে উঠে) ওমা, কোথায় যাবো! পকেটে নাড়ু

ঠেসে এসেছেন? দেখুন কী বিশ্রী দাগ—ছিঃ ছিঃ, আপনি

কী রাজুদা?

রাজেন। তা—হ্যাঁ—না—তা খাবে না? খাও না একটা!

আমি না খেয়ে বথার্থ তোমার জন্তু—



প্রথম অঙ্ক

৭

চপলা। না আমি নাড়ু খাইনে—বাঃ কী সুন্দর ফুলগুলো!
(একটা এলো খোপা জুড়িয়ে ভেস্ থেকে একটা ফুল
তাতে গুঁজে দিলো)—আমি যাই—বাবা আস্লে বলবেন
—বুঝলেন— ?

রাজেন। (নিস্তব্ধ হয়ে চেয়ে—বিহ্বল চোখ) (স্বগত) দিন
দিন চপল যথার্থ আগুনের ডালি হচ্ছে—না বুকটার মধ্যে
যথার্থ—(প্রকাণ্ডে) বাবে ? তা—একটু কাছে এসো না
যথার্থ—(হাত বাড়িয়ে চপলার স্মৃড়ীর আঁচল ধরতে
গেলো, চপলা লীলায়িত ভঙ্গিতে বেরিয়ে গেল—)

চপলা। (যেতে যেতে) প্যেং—আপনি বড়—(নেপথ্যে শোন্সু
গেল ‘নমো হে নমো—’ বাবার সময় মাথার ফুল পড়ে
গেল)

রাজেন। (তাড়াতাড়ি ফুলটা কুড়িয়ে নিয়ে—) ফুলটা যেন ভারই
দেহের যথার্থ টুকরো (বুকে চেপে ধরলো—চোখ ছটো
বুঁজে)—আঃ—চপল—চপল—বুকটা যেন জুড়িয়ে গেল—
ব্যথা—বড় ব্যথা—যথার্থ—

(দামোদারের প্রবেশ)

দামোদর। এই যে রাজু (রাজুর চমক ভাঙ্গল—তাড়াতাড়ি বুক
পকেটে লুকিয়ে) কী বিড়্ বিড়্ করছিলে—কিসের
ব্যথা ?—তা—

রাজেন। এই দেখুন না একটা হিসাব কেরানী বেটা যথার্থ

ভুল করে বসেছে, তাছাড়া—বথার্থ আমার সেই অশ্বলের
ব্যথাটাও—

দামোদর। তাই নাকি ? তা একুনি—ওরে ও তিলক, হু'গেলাস
লেবুর সরবৎ দিয়ে যাতো—সরবৎ খাও দেখি—ব্যথা চোঁ
চোঁ করে নেবে যাবে 'খন।—হ্যাঁ, তারপর এদিকের—
(ইতিমধ্যে তিলক সরবৎ দিয়ে গেল)

(এক ঢোক খেয়ে) আঃ— : হ্যাঁ—কী বেন বলছিলাম—
ও— : —এদিকের খবর কী ! মাষ্টারের বিজ্ঞাপন দিয়েছ ?
কোন কাঁগজে দিলে—কী দিলে দেখি—কাপি আছে
ফাইলে ? দেখি—

(দামোদর আর এক ঢোক সরবৎ খেয়ে, চোখ বুঁজে
একটা তৃপ্তির নিঃশ্বাস ফেললেন)

রাজেন। বথার্থ সব ঠিক হয়ে গেছে—আনন্দবাজারে দিয়েছি—
বথার্থ largest circulation অর্থাৎ কিনা, বেকার মহলে
চায়ের টেবিলে ওই কাগজটারই সবচেয়ে বেশী বথার্থ—
হ্যাঁ দেখুন, একটু idea এঁচেছি—এই আমাদের মানস
মাষ্টারকে boys' schoolএ দিন বদলি করে—বথার্থ বে
বার দলে থাক—দল ছাড়া হ'লে মাথাটা একটু বিগড়ে
যায়—তা ছাড়া—মেয়েরা সব আস্তে আস্তে যুবতী হয়ে
উঠছেন—একবার কানা-ঘুষা সুরু হ'লে ইন্সকুল একেবারে
একদিনে বথার্থ খালি—পাড়াগাঁ—

দামোদর। সে পরে ভেবে দেখা যাবে—তার এখনো সময় আছে। কৈ কী বিজ্ঞাপন দিলে দেখি—সেবারে তো তোমার বুদ্ধিতে এক লেজুড় দিয়ে—কী বিপদ! এবার—
 রাজেন। আজ্ঞে—না না, ফাইলটা ভুলে এসেছি—তা নইলে, কাল সকালে আপনাকে—হ্যাঁ এবার একেবারে যথার্থ
 • ভেড়ার পালের মতো—গুধু,—একটুখানি—

দামোদর। আবার কিছু বাধিয়েছ নিশ্চয়ই—না: তুমিই ইন্সুলটাকে ডোবাবে রাজু—কী কীতি করেছ গুনি—? প্রথমেই বাধা—
 —না: তোমাকে দিয়ে চলবে না রাজু,—

রাজেন। যথার্থ চলবে। আমি না থাকলে এদিনে সব তো লোপাট হ'য়ে যেতো! মাষ্টারের বিজ্ঞাপনের সঙ্গে একটু condition অর্থাৎ লেজুড়—এই সামান্য—apply with the photo of the wife.

দামোদর। না: তুমি, তুমিই ডোবাবে রাজু! জানুয়ারী এসে পড়লো, জেলার ম্যাজিস্ট্রেট সাহেবকে দিন পর্য্যন্ত বলে এসেছি—আর তুমি তার মাঝে প্যাচ কষছো—আমার মুখ ডোবাবে—ইন্সুলও। ফটো ফটো—আরে সবার কী আর স্ত্রীর ফটো থাকে, এই তো গিন্নীর—

রাজেন। আজ্ঞে—আধুনিক যুগ—যথার্থ স্ত্রী হবার আগে থেকেই ছেলেদের পকেটে একগানা ফটো—আর একখানা ছোট্ট চিক্রনি যথার্থ সব সময়—এক টাকায় আটখানা—নানা ভঙ্গীতে—এটা আপনাদের যুগ দিয়ে—

দামোদর । আচ্ছা তা না হয় বুঝলাম—কিন্তু ফটো দিয়ে তুমি কী করবে—নাঃ তোমাকে বোঝা দায়—

রাজেন । আজ্ঞে ওটা একটা Safety—অর্থাৎ কিনা—একটু যথার্থ নিশ্চিত থাকার যায় । (স্বগত) যথার্থ কচু হয়—সেবারও তো—, এখনো তো নিশ্চিত হওয়া যায়নি—মাষ্টার এখনো চপলার—আর হার,—বাসার চাকর যথার্থ—

দামোদর । নিশ্চিত ! আরে চিন্তার তোমার কী আছে—আরে তার জীঃ থাক্—চাই না থাক্, তাতে আমার কী ? বরং unmarried আনলে মন দিয়ে পড়াতো—আর এতো মন পড়ে থাক্বে তার বাড়ীতে—ফাঁকি দেবে, প্রত্যেক শনিবারে,—নাঃ তুমিই ডোবাবে রাজ্, তোমার বাধা,—

রাজেন । আজ্ঞে unmarried কেন—যথার্থ চিরকুমার আনুন না, কিন্তু ম্যাজিষ্ট্রেট সাহেব খুলবেন কিনা—তাই । এবার একটা আইন হয়েছে—

দামোদর । তোমার আইনের নিকুচি করেছি—কৈ দেখি—

রাজেন । •(স্বগত) নাঃ বুড়ো জালালে দেখছি (প্রকাশে) আজ্ঞে সবে Assemblyতে পাশ হয়েছে এখনো ছাপা হয়নি কাগজে যথার্থ—

দামোদর । তোমার মাথা যথার্থ—দেখি কী হয় । তা এখন যাক্—কেমন দালান হয়েছে নতুন ইঁস্কুলের—দেখেছ ?—যেন একেবারে কোলকাতার—

রাজেন । আজ্ঞে যথার্থ—কী সুন্দর বাড়ী—কিন্তু—

দামোদর। নাঃ তুমিই ডোবাবে রাজু, সবতাতেই কিন্তু—কী
কিন্তু শুনি।

রাজেন। আজ্ঞে এটার দোতলার ওপর থেকে মেয়েদের ইস্কুলের
ভেতরটা সব একেবারে—হুঁদিকেই বাড়ন্ত বয়স, পড়াশুনা
ছেড়ে হুঁদিক হাঁ করে—আজকাল আবার মাষ্টার মাষ্টারনী
বড্ড—কাগজে পড়ি—

দামোদর। নাঃ এই কাগজই দেশটাকে ডোবাবে—আচ্ছা আস্তে
আস্তে না হয় মেয়েদেরটাও দোতলা—

রাজেন। আজ্ঞে তা হ'লে স্বার্থ—গুঁতহীন, কী•বে হবে—আর
বেটা বদন সরকার তো পাত্তাড়ি গুটোলে বলে—ওর
স্বার্থ চক্ষু একেবারে ছানাবড়া—ওর ইস্কুল open করলে
ও নিজে, আপনার করবে স্বয়ং জেলার—আর করবে না
স্বার্থ—মানস মাষ্টার যে ইংরেজি—ঐ গুঁরা এসে পড়লেন—

(মানস, নীহারিকা ও চপলার প্রবেশ)

দামোদর। আরে নাতবৌ এসো এসো—বসো সকলে, ওরে
তিলক, তিন কাপ চা—

মানস ও নীহারিকা। (একত্রে) না না, এই বেলায়—

মানস। বরং তিন গেলাস সববৎ দিয়ে যা তিলক।

দামোদর। হুঁ হুঁ—ওর মতো জিনিস নেই, এই তো একটু

আগে,—কী রাজু বুকের ব্যথা নেমেছে—না ? নামতেই
হবে—

রাজেন। আজ্ঞে বার্থ ! তবে এঁরা আসার পর থেকে আবার
 ষেন একটু টন্ টন্ করছে (সতৃষ্ণ চোখে চপলার দিকে
 চেয়ে)

চপলা। আচ্ছা বাবা, তুমি আমাকে ডেকে পাঠিয়েছিলে কেন ?

আমার ক্যারাম খেলাটা—

রাজেন। (স্বগত) আঁ—হ্যাঁ—ছিঁ ছুঁকাঁহুনি ছুঁড়ি—ডোবালে
 দেখছি—

দামোদর। কৈ, না তো মা—তোমাকে তো—

°

(তিলকের প্রবেশ)

তিলক। (সরবৎ পরিবেশন করে) দিদিমণি—কর্ত্তা-মা এক্ষুনি
 ডাকছেন, কী কথা আছে—

চপলা। যাই।

(প্রস্থান)

রাজেন। উঃ ! ওরে তিলক সরবৎ দে—বাথাটা আবার—

দামোদর। তারপর মাষ্টার. ইস্কুল বিল্ডিং কেমন হয়েছে—রাজু

• বলছে তোমাদেরটাও দোতলা করে দিতে, তা না হ'লে
 নাকি মেয়েদের দেখা যাবে—যুবতী মেয়েরা—হাঃ হাঃ,
 ওরা আবার যুবতী—এই তো চপলা, ছেলেমানুষ—কী
 বলো ?

• মানস। নিশ্চয়ই—ওতো একেবারে—

রাজেন। (স্বগত) হুঁ, একেবারে—তোমার মাথা, তাই তো
 দিনরাত,—

দামোদর। নিশ্চয়ই—আরে গিন্নীকে যখন নিয়ে এলাম তখন
 ঠাঁর বয়স সাত—একেবারে ছেলেমানুষ, প্রেমালাপ দূরে
 থাক, রাতে আমার গলাটা জড়িয়ে সে কী কান্না,—সর্দি
 হ'লে নাক দিয়ে তখনো—হাঃ হাঃ, কখন যে তিনি যুবতী
 হলেন সে তো পাত্তাই পেলাম না,—তাই না এখন
 • নাতবৌকে দেখে, গিন্নীকে তালাক্—

(মানময়ীর প্রবেশ)

মানময়ী। আবার গিন্নীর কী চোদপুরুষ উদ্ধার কর' হচ্ছে শুনি—
 দামোদর। আরে এসো এসো—আচ্ছা গিন্নী তুমি কী কখনো
 যুবতী হয়েছিলে? আমার তো মনে পড়ে না—এই
 নাতবৌএর মতো, এই ভরা গাল, ভরা শরীর—হাঃ
 হাঃ হাঃ—

মানময়ী। কী যে বলো ছেলেদের সামনে! তোমাকেই কী ছাই
 যুবক হতে দেখেছি—এই নাতীর মতো—

নীহারিকা ও মানস। (একত্রে) দাদামশায় এইবার জন্ম—আমি
 বলবেন—?

দামোদর। আচ্ছা, আচ্ছা সে পরে হবে 'খন। এখন একটু
 পরামর্শ করি সকলে, এসো দেখি। শুনেছ মাষ্টার—
 মাষ্টারের জন্তে তো বিজ্ঞাপন দিয়েছি—আরে তাতে রাজু
 আবার লেজুড় দিয়েছে—নাঃ তুমি ডোবাবে রাজু,—কী
 লেজুড়টা বল না ছাই।

রাজেন। আঙ্কে, apply with the photo of the wife—
এতে—

দামোদর। শুনলে তো? আচ্ছা বলে তো এতে কী মাষ্টার
মিলবে—গিন্নীর তো ফটো নেই—বল্লৈ বলতেন, তোমার
থাকলেই হলো—ঐ তো বুকে মিশে আছি—

মানস। তা তো ঠিকই বলেন দিদিমা—তা দাদামশাই মাষ্টার
যথেষ্ট মিলবে।

দামোদর। মিললেই বাঁচি। জামুয়ারী তো এসে পড়লো—
তোমান্নের বেলাতেও রাজুই দিলে এক লেজুড়—ফলে দেবী
হলো যথেষ্ট। আরে বাংলাদেশে কী গ্র্যাজুয়েট স্বামী-স্ত্রী
পাওয়া যায়—কপালগুণে তোমরা—

(নীহারিকা ও মানস পরস্পর তাকিয়ে একটু হাসলো)

নীহারিকা। না দাদামশাই—জুটবে—স্ত্রীর ফটো আর এমন
ছল্ভ কী—বিয়ের আগে থেকেই—

রাজেন। ষুধার্থ বলুন দেখি—আমিও এই কথাই বলেছিলাম—
না দেখুন—আমি যাই—অফিস-রুমটা একটু দেখে শুনে—
আর তা ছাড়া শরীরটাও বিশেষ—

(প্রস্থান)

নীহারিকা ও মানস। (একত্রে) আমরাও উঠি দাদামশাই—
বেলা হয়েছে!

দামোদর। নাতবোঁ উঠেছে কী—অমনি কাছায় টান্—

প্রথম অঙ্ক

(নীহারিকার চিবুকে হাত দিয়ে) একটি শিশু-দেবতা এলে
আর তোমার টানে কিছু হবে না নাতবো—

নীহারিকা । ধ্যেৎ— (প্রস্থান)

দামোদর । চল আমরাও যাই—এ ঘরে কী আর থাকা যায়—
'আলো তো নিভে গেল—

(সকলের প্রস্থান)

দ্বিতীয় দৃশ্য

[পার্কের সামনে, মির্জাপুর ষ্ট্রাটের ওপর, চারতলায় একটা মেসের ঘর । ঘরে
ছুটো সিট, দু'জনেই বন্ধু—অশেষ চক্রবর্তী, এম-এ পাশ, বিশ্ববিদ্যালয়ের কৃতী
ছাত্র । গরীব, এবার পাশ করে সম্প্রতি বেকার । চারটি টিউশনি করে
চলে । অপরজন ধনী, কাটিহারে বাপ বড় চাকুরে—জমিদারীও আছে ।

ছেলে অতি আধুনিক—প্রেমিক, কোলকাতার নামজাদা মেয়েদের

সঙ্গে পরিচিত, প্রায়ই একসঙ্গে সিনেমা দেখা যায় ।

ঘরের দৃশ্য মামুলী—ইতস্ততঃ বিক্ষিপ্ত জিনিস-পত্র—

মেসের চির-প্রসিদ্ধ বর্ণনা]

অশেষ । (একা বসে একখানা বই পড়ছিল) নাঃ—রবিবারটা
একেবারে মাঠে মারা গেল দেখছি—যাই একবার সিনেমা
ঘুরে আসি—দ্রুত—পয়সা—পয়সা করেই জীবনটা যাবে
দেখছি—যাক্ ! এতো নিরামিশ আর পারা যায় না—ঐ
তো সুধীরটা, দিব্যি আছে—মেয়ে নিয়ে ছিনিমিনি—ঘেন

পাশার হাড়—হু’হাতে চটকাচ্ছে—মার আগি—এক মা
ছাড়া বোধ হয় মেয়েমানুষের গা ছুঁইনি কখনো—মার
গোলি ! আজ বাব সিনেমা—যাক্ একটা টাকা—ওরে—
কানাই—কা—নাই !

(নেপথ্যে—“মাই বাবু—”)

মাই বাবু না বাবা—একটু তাড়াতাড়ি এসো দিকি—
ছটা বাজে !

(কানাইএর প্রবেশ)

কানাই । কী বাবু ?

অশেষ । ওরে ঝাথ্—এ তিনটে পয়সা নে—এই নীচেই ঝাথ্
রাস্তার ওপর মুড়ি বিক্রী করছে—দেখেছিস্— ? ঐ শোন
—(নেপথ্যে—“গরম—মুড়ি—”) ঐ—এক পয়সার মুড়ি
নিবি—হু’পয়সার চা—ঐ উড়ের দোকান থেকে আনিস্—
বলিস একটু বেশী দিতে—বরং এই বড় কাঁচের গেলাসটা
নিয়ে যা— । বুঝলি—সব ? যা যা বললাম ?

কানাই । আজে হ্যাঁ বুঝেছি । (প্রস্থানোত্তম)

অশেষ । আর ঝাথ্—এই নে—এক পয়সার বিড়ি নিস—ছুটো
চেয়ে নিস্—বুঝলি—বেটা নিজেদের বেলা—

কানাই । দিতে চায় না বাবু—বলে লাভ থাকে না—

(প্রস্থান)

অশেষ । না, লাভ থাকে না—এম্-এ পাশ না করলে একটা
বিড়ির দোকানই—

সুধীর। (হঠাৎ ঘরে ঢুকে—) বিড়ির দোকান দিবি নাকি ?
তা আর দেবে না ? গায়ের রক্ত জল করে এম্-এ ফাষ্ট
ক্লাশ পেলে—এখন—একটা M. A. & Co.—বিখ্যাত
মোহিনী বিড়ি ? কী বলিস্— ? তোরাই—দেশটাকে
ডুবালি !

অশেষ। যা যা—লেক্চার্ দিস্ না—বাপের পয়সা আছে কিনা ?
হুনিয়াটাকে রঙ্গীন দেখছ ! হাতে ওটা কীরে— ? দেখি—

সুধীর। উহুঁঃ—বিড়িওয়ালার কপালে জোটে মা—একটা চীজ্ !

অশেষ। চীজ্ ছাড়া তো তোর বোলই ফোটে না, কোথেকে
জোটালি ? (সুধীরের হাত থেকে প্যাকেটটা নিয়ে—)
ও বাবাঃ সত্যি তো ! চীজ্ই বটে ! † একটা চুমু খেয়ে—
তোর—

সুধীর। (কেড়ে নিয়ে) দিলি তো এঁটো করে—রাস্তায় ছিনু
বলে আমি এখনো বউনি করিনি—আর তুই ব্যাটা
বিড়িওয়ালা—

অশেষ। বিড়িওয়ালা কোলকাতার ঐ রকমই—(হাসে) ফোন্
বান্ধবী বাবা— ! বেড়ে-এ ফটো তুলেছে তো—হঁয়ারে
গায়ে এটা ব্লাউজ্— ? বাদ্ছাদ্ দিয়ে যেন পাঞ্জাবীর একটা
পকেট—কিন্তু চেহারাখানা—হঁ্যা— ! পয়সা খরচ করে
তৈরী !—কোথেকে বাগালি রে ?

সুধীর। তোর কাছে গুমোর করে লাভ নেই । একটা ফটোর
দোকান থেকে—show-caseএ ছিল, দিতে কি চায়—

নগদ দশ টাকা নিলে, কাউকে বলিসনি কেন। নতুন বান্ধবী বলে চালাবো—বাবা—এ মাল বার জুটেছে—
উঃ!

(চোখ বুজে, ঠোঁট ছুটো কাঁক করলে)

(কানাই মুড়ি ও চা নিয়ে প্রবেশ করলো)

কানাই। এই যে বাবু—বিড়ি বেশী দিলে না—(চা ও বিড়ি টেবিলে রেখে, মুড়ির ঠোঙ্গাটা তার হাতে দিলো) আমি একটা বিড়ি নিলুম বাবু—

অশেষ। নে বেটা নে—বেশী আনতে বললাম।—(ঠোঙ্গাটা নিয়ে নাড়াচাড়া করতে লাগলো)

সুধীর। ওরে কানাই দাঁড়া, দাঁড়া—আরো কিছু আনাই। পরে

একসঙ্গে খাওয়া যাবে—ওরে কানাই বাতো—আরো ছ'কাপ চা—উড়ের দোকান থেকে এনেছ কী মার খেয়েছ—আর কিছু খাবার নিয়ে আয়। এই নে টাকাটা

নিয়ে যা—

(কানাইএর প্রস্থান)

অশেষ। আয় ততক্ষণ এগুলো খাই—পরে ওগুলো খাওয়া যাবে—(অর্ধেকটা মুড়ি ওর হাতে ঢেলে দিলে)—চাটা খাবি একটু—

সুধীর। না—অতো উড়িয়া—প্রেম তুমিই দেখাও—আমার সহিবে না—

অশেষ । (হঠাৎ কিসে চোখ পড়ায়) কীসের wanted বাবা !
(মুড়িগুলো টেবিলে ঢেলে, ঠোঙ্গাটা পড়তে লাগলো—
উল্টিয়ে)

স্বধীর । কীরে অতো মনোযোগ—legal intelligence ? পড়
না জোরে—

অশেষ । ঈস্-স্ ! একটুর জন্তে মাইরি ফস্কে গেল । উঃ, মা
বলেছিলো, মেয়ে দেখাও শেষ—কী ভূত চাপলো ঘাড়ে,
'নেহি করেগা', মা'র চোখের জলও পড়লো—তারই তো
অভিশাপ, সাথে কী শাস্ত্রে বলে—'গুরুবাক্য না শোনে
কানে'—পণ করলাম কোলকাতার মেয়ে না হ'লে—হুতুরি
নিকুচি করেছি কোলকাতার মেয়েকে—এই তো এখন
একটা থাকলে—নাঃ—“স্ত্রী-ভাগ্যে”—মাইরি, শাস্ত্র মানতে
হয়—তোরও নেই বে সেটা দিয়ে আপাততঃ কাজ চালিয়ে
দিতাম—

স্বধীর । ওরে ছুঁচো—আমার বউ দিয়ে কাজ চালাবে ?—কী,
অতো বক্তিম কিসের—ব্যাপারটা পড় না—হটাৎ ঠোঙ্গা
দেখে প্রিয়ার স্মৃতি—“ঠোঙ্গাদূত” !

অশেষ । শুনবি ! শোন্—“Wanted a graduate tutor for
Manmoyee Boys' School on Rs. 100/-; must be
married. Apply with the Photo of the wife.
None need apply without photo.” শুনলি—?
এখন কী করা যায় বলতো—?

সুধীর। করা যায় তোমার মাথা! কবেকার ঠোঙ্গা তার নেই
ঠিক—ঐ কাগজ লোকে পড়েছে—বিক্রী হয়েছে পুরোণ
কাগজের দোকানে—ঠোঙ্গা হয়েছে—মুড়িওয়ালার কিনেছে,
এখনো ও চাকরী খালি আছে, না?—নে নে চা খা—ঐ
কানাই এসেছে—

(কানাইএর প্রবেশ)

অশেষ। ওরে কানাই—একটা কাজ করবি? ত'টো পয়সা
দেবো! দৌড়ে যা—এই ঠোঙ্গাটা নিয়ে, সেই মুড়িওয়ালাকে
জিজ্ঞাসা করে আয়—এটা কবেকার কাগজ,—আর
ঠোঙ্গাটা কে করেছে—যান! লম্বিটা—

কানাই। সে কী ঠিক আছে বাবু—কবেকার না কবেকার,—
অশেষ। তবুও তর্ক করবি—একবার যা-ই-না বাপু।

(কানাইএর প্রস্থান)

সুধীর। তোর মাথা খারাপ হয়েছে—আচ্ছা ধর, ওটা আজকেরই
কাগজ—কিন্তু বউ কোথায় পাবি? সেটা শুনি!

(ইতিমধ্যে অশেষ উপায় ভাবছিল—)

অশেষ। (হঠাৎ) the idea! উঃ—খোদা যব দেতা—the
idea! কী সুন্দর idea. মাইরি সুধীর ঠিক লেগে যাবে—
কী জানি কেন আমার প্রাণটার মধ্যে—এখন যদি তুই
দয়া করিস্—দাখ্ মাইরি—

সুধীর। (একটা সিঁদাড়া মুখে পুরে) কী ideaটা শুনি! আরে,

তুই খা—খেতে খেতে idea solve করা যাবে ভাল। নে
নে খা—(অশেষ অগ্রমুখ হ'য়ে একটা লক্ষ্য তুলে দিলে
কামড়)

অশেষ : উঃ—হু হু গেছি। বাবাঃ! একেবারে tiger brand !
(সুধীর হেসে উঠলো, অশেষ তাড়াতাড়ি একটা রসগোল্লা
মুখে পুরে চুপ) লক্ষ্যের কামড় শুভ। শুভরে—বুঝলি।

সুধীর : হাঁ, এখুনি তোমার একটা বউ চচ্ চ—অ—র করে'
গজিয়ে উঠবে, আর তুমি একেবারে appointed !

অশেষ : যা যা, তোর সব তাতেই ঠাট্টা! • এখন তুই help
করলেই বাস্—কেল্লা ফতে।

সুধীর : কী! helpটার একবার আঁচ শুনি? আমাকে মেয়ে
সেজে তোমার বউ হ'য়ে একখানা ফটো তুলে দিতে হবে
তো?

অশেষ : ডাঃ—তা কী হয়, ঐ চেহারায় মেয়ে—?

সুধীর : তবে কী?

অশেষ : বল্ দিবি?

সুধীর : না শুনেই দান। কী বাবা, কী না জানি চেয়ে বসবে।

অশেষ : না মাইরি, তোকে দিতেই হবে—চাকরী হ'লেই তোর
জিনিস তোকে—

(কানাইএর প্রবেশ)

কীরে কী বল্লো, অ্যা—

কানাই : কালকের কাগজ বাবু, ও নিজেই—

অশেষ। হিপ্ হিপ্—

কানাই। কিছুতেই কী বলতে চায় বাবু, দুটো পয়সা কবুল করে—

অশেষ। নে নে, তুই দুটো, আর সে বেটা দুটো—যা এখন পালা। ওরে ঠোঙ্গাটা দিয়ে বা—

(ঠোঙ্গা দিয়ে কানাইএর প্রস্থান)

সুধীর, বল না ভাই, তুই এখন আমার অধম-তারণ—
দোহাই তোর, বল—কথা দে।

সুধীর। কী বিপদ! আচ্ছা, দিলাম কথা—বল তোর idea—
তাড়াতাড়ি, আমায় সিনেমায় যেতে হবে।

অশেষ। তাগ্ ভাই কী idea! উঃ, হ্যাঁ মাথা বটে, সার্ব
আশুতোষের চেয়েও—সত্যি কী idea!

সুধীর। ফের ফ্যাচ্ফ্যাচ্ করছিস, চল্লম আমি—

অশেষ। না না, মাইরি—এই বলি। শোন, কিন্তু কী idea!
না না, রাগিস না—এই শোন, তোর ঐ ফটোটা—অগ্নি মুখ
কাগো হনো? এই বন্ধু! কার না কার ফটো—নিজের
কারুর হ'লেও-বা, ওটা দে, আমি ওটাকে পাঠিয়ে দি—
তুই আর আমি, তৃতীয় ব্যক্তি জানতে পারবে না, তারপর
চাকরী পেয়ে তোকে না হয় ফেরৎ দেবো। নির্ঘাৎ লাগবে
—কী মুখে গ্রহণ লাগালি যে? আরে অজ্ঞাতকুলশীল,
তার জন্তে এতো? বন্ধুর জীবিকা—

সুধীর। হ্যাঁ, অজ্ঞাত-কুলশীলকে তুমি বউ বলে চালাবে, তাতে
দোষ নেই! আর আমি ফটো রেখেছি—

অশেষ : আরে দূর. বউ ? বউ ? চাকরীর জন্তে আপাততঃ চালিয়ে দিচ্ছি—আবার তারপর ওকে না হয় তোর বউ করে নিস্, আমি ফেরৎ দেবো। কে জানতে যাচ্ছে, সেই কৃষিামামার দেশে—আমারই বউ ! হাঃ হাঃ, কিন্তু কী idea বল দেখি ! জাপ্ আমার ডান হাতটা চুলকোচ্ছে (তালুতে চুমু খেয়ে) নির্ঘাৎ বুলেট, বন্ দিবি তো ?

সুদীর : ভাই সবে আনলাম, এর মধ্যে হাতছাড়া ?

অশেষ : পাগল ! আবার, say এক হপ্তা পরেই তো “তোমাতে আসিবে ফিরি”—চাকরী পেয়েই পাঠিয়ে দেবো, না হয় আমি বাইরে সাজি একটু—আপততঃ ভুই বা ইচ্ছে করে নে ছবিতে—যা মন চায়।

সুদীর : আর যদি চাকরী না পাস—তোর বউও গেল, আমার ছবিও—

অশেষ : God forbid ! তাহ’লে—ফেরৎ আনবো—

সুদীর : এ জিনিস কেউ পেল কী আর—

অশেষ : পাগল—উকিলের চিঠি দেবো—যে আমার বউকে illegally detain করেছে, abductionএ পড়বে যে—law তো পড়লি না—।

সুদীর : ছবিতে হয়—

অশেষ : আরে হ্যাঁ হ্যাঁ—শুনবি lawটা—“To detain illegally either in person or in picture—হঁ হঁ বাবা—ব্রিটিশ রাজত্ব ! সোজা সাত বছর !—জাপ্ ভাই

রাজি হ'—আবার—“তোমারে ফিরায়ে দেব তোমার
রাখাল—”

স্বধীর। আচ্ছা! কিন্তু এই ছাথ্ একটা বাধা আছে—এই
ছাথ্ impression দিয়ে লেখা—sample copy—Miss
Niharika Ganguly—Electro studio, Calcutta—
এটাকে কী করবি? বিয়ের আগের ফটো বলে চালাবি?

অশেষ। দূর! ওর ওপর কাগজ স্টেটে দিচ্ছি—Mrs. Ashes
Chakravarty—আরে এতো সহজং।

স্বধীর। আচ্ছা—বা ইচ্ছে কর—কিন্তু—মাল মোদা আমার ফেরৎ
চাই—আমি চল্লম সিনেমায়—

(ফটোতে একটা চুমু খেয়ে প্রস্থান)

অশেষ। থ্রি চিয়ান্স ফর্,—নির্ঘাৎ লাগচে—কী জানি কেন
আমার মনে হচ্ছে! চাকরীটা যদি হয়—যদি কেন, বাট
বাট,—হ'লে—গরমের ছুটিতে এসেই এক বিয়ে, মা'র
মুখে দুটে উঠবে হাসি—ই্যা কিন্তু নাম দেব...নীহারিকা,
পরমন্তু নাম দেবো...বাসর ঘরে তার দেবো—নতুন নাম!
কিন্তু কে বাবা স্তন্দরী—ছবিতে তোমাকে মিথ্যা স্ত্রীরূপে
পেয়েই আমার প্রাণটা জুড়িয়ে যাচ্ছে—আঃ—(ছবিটাকে
বুকে চেপে ধরে) নাঃ—দেবী নয়। দরখাস্তটা টাইপ করে
রাখি—কাল সকালেই রেজিষ্টারী করে দিতে হবে। জয়
মা কালী—জয় বাবা খোদা—জয় বাবা যিশু—জয় পীর
বাবার—যে যেখানে জাগ্রত থাক, আমার করুণ ডাক

শোন বাবা—আমি সব মানি, লক্ষ্য তো একই—বিভিন্ন
রাস্তা। সব মানি বাবা—সব মানি—Cosmopolitan
ধর্ম আমার বাবা—তোমাদের এই respective সন্তান—
অধম সন্তানকে তুটো খেতে দাও বাবা—

(নেপথ্যে—‘অশেষবাবু ঘরে আছেন নাকি’)

কে ? আসুন—অপাততঃ আছি ।

(ম্যানেজারের প্রবেশ)

ম্যানেজার । দেখুন—গোটাকতক টাকা দিন না—ডু’মাসের
বাকী—

অশেষ । (মুখের কথা কেড়ে নিয়ে) আর মশাই ডু’মাস—আরে
ডু’মাস না হয় আগাম নেবেন—ডু’দিন সবুর করুন, চাকরী
পেয়েছি মশাই, চাকরী পেয়েছি ।

ম্যানেজার । হুঁ—চাকরী ? কতোবার তো শুনলাম, আচ্ছা
টাকাও তো পান, করেন কী ?

অশেষ । করি কী ? ঐ সামনের পুকুরে ফেলি—আর শুনি তার
টুপ্ শব্দটি, দেখি ছোট ছোট গোলাকার চেউগুলো—গুলি
সেগুলো তীরে বসে—মদ খাই, বেঙ্গাবাড়ী বাই—গুলি
আপনাকেই দিই না—আরে মশাই স্ত্রীভাগ্যে—নির্ঘাৎ—

ম্যানেজার । বিয়ে করছেন বুঝি ? কোলকাতায় ? শাঁশাল স্বস্তর ?
আচ্ছা, আচ্ছা ডু’দিন পরেই দেবেন—দরকার ছিল তাই,
তা চালিয়ে নেবো’খন—

(প্রস্থান)

অশেষ । ‘স্ত্রীভাগ্যে—বাবা স্ত্রীভাগ্যে’—কেমন ছাড়লো ? কোন দিন ব্যাটা এতো সহজে ছাড়ে ? সুরুউৎ—নাঃ—বাই দরখাস্তটা টাইপ করতে হবে—

(ফটোতে একটা চুমু খেয়ে প্রশ্নান)

তৃতীয় দৃশ্য

[মানস মাষ্টারের শোবার ঘর । বেলা—সকাল সাড়ে সাতটা আটটা হবে ।

মানস একথানা ডেক্‌চেয়ারে বসে সেদিনকার কাগজ পড়ছিল—

আধুনিক ফ্যাসানে ঘরখানা সুসজ্জিত—রুচির
নিখুঁত পরিচয়]

মানস । ওহে হারু—ও হারু—(নেপথ্যে—“আজ্ঞে বাবু—বাই বাবু—) বাই বাবু নয়, তোর দিদিমণিকে ডেকে দে—আর চা দিবিনে ?

(নেপথ্যে—“দিই বাবু—”)

তোর দিদিমণিকে—

(নীহারিকার প্রবেশ)

নীহারিক । এই যে—দিদিমণি—কেন ? স্নানটা সেরে নিলাম—বড় ক্লান্ত বোধ করছিলাম—(একটু হাসলো) তুমি যে পলকে হারাও—ওমাঃ চা দেয়নি—নাঃ, এ ব্যাটাকে নিয়ে আর—কোথেকে জুটিয়েছিলে ওটাকে—বলি ও হারু—কী

মংলব্ তোমার বলো দেখি—একদিন আমি নেই—বাস্
সব বেঠিক—(নেপথ্যে—“এই যে মিসিবাবা—”) বেটা
ও ডাক আর ছাড়বে না—

মানস। ওর কী দোষ, তুমিই তো—এই, শোন এদিকে—দেখ
একটা মজা—(খপ্ করে তার আঁচল টেনে ধরলো)

নীহারিকা। আঃ—কী যে করো—সময় নেই অসময় নেই, ঐ যে
হার আসছে—

(হারু এসে চা ইত্যাদি রেখে দিল)

দেখো—আমার চা ওই অর্গ্যান টেবিলে দাও—একটা গান
করতে করতে খাব, কীগো তোমার আপত্তি আছে ?

মানস। আপত্তি ?—রামঃ বলো ! সে বা জমবে—বা ব্যাটা তুই
তাঁ করে কী গুনছিস্—বেটার সগ্ দেখো !—এই, ওই
সিগ্রেটের টিনটা দিয়ে বা—

(হারু টিন দিয়ে প্রস্থান করলো)

(নীহারিকা গান ধরলেন—মানস খাওয়া ও কাগুজ-পড়া .

ত-ই চালাতে লাগলেন)

(নেপথ্যে—“হজুর—”))

মানস। Come in !

(খট্‌মট্‌ সিং সেলাম করে' দাঁড়াল)

খট্‌মট্‌। হজুর চিঠি ! রেজেষ্টরি একঠো—

মানস। (দেখে) ই মেরা নেহি—সেক্রেটারি বাবুকো—

খটমট। হুজুর—সিক্রিটারি বাবু সদরে গিয়েছেন—কর্তাবাবু
আপনাকেই নিতে বললেন—

(গ্রহণান্তে—খটমটের প্রস্থান)

মানদ। (স্বগত) ঠিক দরখাস্ত ! কতোই তো আসছে—দেখি
এঁর স্ত্রীর মূর্তি। রাজেনবাবুর মাথা খারাপ ! যতো অদ্ভুত
কীর্তি “বজ্র আটুনি—” আমাদের বেলাতেও তো ! বেদম
ফাঁকি দিয়েছি—সেই রকমই কেউ দেবে হয়তো—

৴ খামখানা ছিঁড়লো—নীহারিকা তন্ময়
হ’য়ে গান করছে)

এই বে ফটো—(ফটোখানা দেখে—হাত থেকে
দরখাস্তখানা মাটিতে পড়ে গেল—মুখের সামান্য দখ
সিগ্রেটটা ফেলে দিলো—নীহারিকার দিকে একবার—
ফটোর দিকে একবার চেয়ে—)

একী ? আচ্ছা ভেল্‌কী তো—ও বাবা !—একেবারে
অঁথ জল ! সব ডুবলো দেখছি ?

(তাড়াতাড়ি উঠে গিয়ে ফটোখানা দেয়ালে বন্ধ
করে এসে পুনরায় বসে পড়লো)

দেখি দরখাস্তখানা পড়ে—! অশেষ চক্রবর্তী—
এম্-এতে ফাষ্ট ক্লাশ ! ঠিক হয়েছে—এ না হয়েই যায় না
—কিন্তু ব্রাহ্মণ তো এ—হলোই বা ? Inter caste বিয়েও
তো—না এই মেয়েজাতকে বোঝাই দাঃ—স্বয়ং মহাকবি

শেক্সপিয়ার মেয়েদের স্বরূপ বুঝতে পারেনি—আর আমি ?
 Treachery thy name is woman ! এর চেয়ে দেখছি
 চলে গেলেই ছিল ভাল—কী গ্রহরে বাবা—(নীহারিকা
 দিকে তাকিয়ে)—কিন্তু একে ছাড়লো কেন ? এতো
 বিত্তা—আরে দূর—এ জাতের কী কিছু বোঝবার যো
 আছে—তায় বি-এ পাশ—উপরন্তু থুঁচান্—একেবারে—

(গান বন্ধ হলো)

নীহারিকা । কী গো অমন করে চেয়ে আছ যে ? কেমন লাগলো
 গান—ওকী—দরখাস্ত বুঝি—দেখি দেখি ! কই এর ফটো
 নেই ! (দরখাস্ত পড়ে' একটু চিন্তা করে') লোকটার যেন
 নাম শুনেছি—কই এর স্ত্রীর ফটো দেয়নি—

মানস । না—জোটাতে পারেনি বোধ হয় ।

নীহারিকা । তা'লে একে appoint করো না, কী জানি কী
 লোক ! নাম শুনেছি কোলকাতায়—খুব ভাল ছেলে—

মানস । চেনা-শোনা আছে ?

নীহারিকা । উ-হঁঃ । শুধু নাম শোনা ! বোধ হয় unmarried.
 দরকার নেই এনে—এতোগুলো মেয়ে নিয়ে কারবার—

(চপলার প্রবেশ)

চপলা । মাসি, তোমাকে একবার মা ডাকছে—একুনি—মা'র
 কী ব্রত আছে—সধবা চাই—

নীহারিকা । ও হোঃ ! কাল আমাকে বলেছিলেন বটে—ওগো

তুমিও চলো না—দাহুর সঙ্গে গল্প করবে—চলো—জামা
এনে দেবো ?

মানস। নাঃ—! আমার অনেক কাজ—তুমিই যাও। রাজেন
বাবু নেই, তাঁর কাজটা আমাকেই সারতে হবে—


নীহারিকা। তোমার সব তাতেই জেদ্—চল চপল, হ্যাঁ দেখো—
রান্না হ'লে হারুকে পাঠিয়ে দিও, বুঝলে? একসঙ্গে খাবো—
ওরে হারু—

হারু। (নেপথ্যে) আচ্ছ—

নীহারিকা। বাবুকে চান করিয়ে আমাকে বড় বাড়ী থেকে
ডেকে আনিস, বুঝলি? চল চপল—

(ছ'জনের প্রস্থান)

মানস। উঃ! কী ছলনাময়ী। তাইতো বলি—এক কথায়
চাকরী—সামান্য চাকরীর খাতিরে একজন অচেনা লোকের
স্ত্রী হতে রাজী। তখন বুঝিনি—ভাবলাম অভাবে—
আরে বাবা—অভাবে কী কেউ এমন কাজ—কই বলি
দেখি কোন ভদ্রকথাকে—!! আচ্ছা এ ভদ্রলোককে
ছাড়লো কেন? পুরোণ হয়ে গিয়েছিলো বোধ হয়—
তাইতো বলি—প্রথমে কতো নাকে কাঁছনি—শেষে—ও
বাবাঃ! একেবারে গুটিপোকা—এ বেচারী গরীব—আমারি
অবস্থা! ছিল একখানা ফটো—দিয়েছে চুকে—জানে না
তো যে দেবী এখানে আমার স্বন্ধে—উঃ, এখন দেখছি
পেলেই ছিল ভাল—আর ছেড়েছে—?



প্রথম অঙ্ক

(দামোদরের প্রবেশ)

দামোদর । কী মাষ্টার ! কী ছাড়বে ? নাতবো ?

মানস । (স্বগত) এইরে ! শুনলো নাকি, বুড়ো বড় আড়ি পাতে
—(প্রকাশ) আমুন—আমুন—আজ্ঞে না—আপনার
নাতবো ছাড়লে—ধাতও ছাড়বে—এই মাথাটা বড় ধরেছে
—তাই—

দামোদর । মাথা ধরেছে ? দাঁড়াও । ওরে হারু—

(হারুর প্রবেশ)

হারু । আজ্ঞে—

দামোদর । বাতো—কর্তা-মাকে বলে মাথা ধরার ওষুধটা চেয়ে
নিয়ে আয়—আর ছাপ্—ছু'পেয়ালা চা পাঠিয়ে—আর বড়
শীত—কী বলো মাষ্টার ? (হারুর প্রশ্নান)
তারপর মাষ্টার—আজ কোন দরখাস্ত এসেছে ? আর তো
সময়ও নেই—

মানস । আজ্ঞে এসেছে । আমার মনে হয় এই লোকটি
সবচেয়ে উপযুক্ত—অগাধ বিদে—Universityর নাম করা
ছাত্র কিন্তু wifeএর ফটো পাঠায়নি—

দামোদর । আরে চুলোয় বাক্ ফটো—তুমিই ডোবাবে রাজু, আমি
wife চাইনে—চাই মাষ্টার । একেই তুমি তার করে দাও
মাষ্টার—রাজু আসলেই বখেরা করবে—

মানস । (স্বগত) এনে ফেলি, দেখি রগড়টা, ঝা হয় ছেড়ে-ছুড়ে
যাবো চলে, বিয়ে তো হয়নি এখনো—এই গরমের ছুটিতেই

হবার কথা—উঃ ভাগ্যিস্ (প্রকাশে) হ্যাঁ তাই দি,
আপনার অনুমতি—

দামোদর। আরে অনুমতি, তুমি বা করবে, তুমিই তো সব, তার
করে দাও—appointed. Come sharp. অমনি গাড়ী
ভাড়াটাও পাঠিয়ে দাও—যে দিন-কাল—হ্যাঁ খুব নামী
ছেলে ?

মানস। আজ্ঞে, Universityতে first—

দামোদর। বটে বটে, তবে তো ম্যাজিস্ট্রেট সাহেবকে বলতে হবে
—তুমি ইংরিজিতে বলে দিও তো মাষ্টার যেদিন তিনি
ইস্কুল খুলবেন, বুঝিয়ে বলো—বুঝলে ? বেটা বদন সরকার
গুনুক একবার, আর ও বুঝবেই বা কী, কাকে বলে first
আর কাকে বলে last। বেগুন বেচা ছোটো পয়সার
গরমে—হাঃ হাঃ—এসব বুঝবার রক্ত থাকা চাই—

(হারু চা দিয়ে গেল)

ঐ একটা পিল্ খেয়ে ফেলো দেখি, মাথা জ—ল হ'য়ে যাবে
—একেবারে ধনস্তরী ! এই পিল্ খাবার লোভে গিল্লীর
প্রায়ই মাথা ধরে—অবিশ্রি প্রধান কারণ আমি যাতে
মাথাটা টিপে দি—

মানময়ী। (প্রবেশ) খুব যে নাতীর কাছে স্ত্রী-ভক্ত সাজছ,
বলি আমার করে ? উনি আমার মাথা টিপবেন, তবেই
হয়েছে। বামীকে একশ' বার তোষামোদ করে' তবে
একটু তিল তেল মাথায় ঠাসিয়ে নি।

(পশ্চাতে নীহারিকার প্রবেশ)

দামোদর । মিথ্যে বলো না গিন্নী—সেই সেদিন ? মনে আছে ?
মানময়ী । ছাই ! দেখো একবার নাতীকে, বউ অন্ত প্রাণ ।

• আজকালকার ছেলেরা বেশ, ছুখ্ দরদ বোঝে—তবুও তো
এখনো কোলে কিছু আসেনি—আর আমি, বিয়ের সময়
• বয়স ছিল মাত—দশ বছর বয়সেই পেটে একটা এলো—

দামোদর । আরে এলো কেন ? না আনলেই তো পারতে !
আমি কী—

মানময়ী । ঠাখো ছেলেমানুষ এরা, এদের সামনে আর কী বলবো
—না আসলে ঠাকুমা ফিরে বছরেই না তোমাকে আর
একটা বিয়ে দিতেন—এ যুগ বেশ বাবা, দু'জনে একটা
পরামর্শ করে—এ কী আমরা—যেন নিজ্জীব কল ! কিন্তু
তাই বলে নাতবো তোমার কোল খালি এখন আর ভাল
দেখায় না—ওতে মেয়েদের শরীর ভাল থাকে না, কী
বলো নাতী ? বলো না গো ।

মানস । (লজ্জিত হয়ে) আজ্ঞে আপনার নাতবোকেই জিজ্ঞাসা
করুন—আজকালকার মেয়েরা মা হ'তে চায় না—

মানময়ী । ও-মা ! সে কী গো ? অ্যা নাতবো ? (নীহারিকার
চিবুক তুলে) কী মা, কী মত তোমার ?

নীহারিকা । না ঠাকুমা, ওর কথা শোনে কেন ? আমি এ
যুগের হ'লেও, সে মত নয়—

মানস । (স্বগত) হুঁ, তাই তো একটাকে ছেড়ে—ক' ছেলের মা
তা কে জানে—

নীহারিকা । তবে কী জানেন, এই বাজারে নিজেদেরই পেট
চালান দায়—তার আবার—

মানময়ী । ওঃ মা, তাই বলে—কী অলুফণে কথা, আচ্ছা, নয় তো
আমাকে দিও মামুস করতে—কী বলো গো ?

দামোদর । নিশ্চয়ই, আর তাছাড়া গিল্লীর এমন কী বা বয়স,
নিজেরও এখন হবার—

মানময়ী । আখো, তোমাকে সামনে করে ছেলেদের সঙ্গে কথা
বলা দায় ! সেদিন অমনি ফস্ করে মেয়েটার সামনে—

দামোদর । কী করেছি ! আচ্ছা তুমিই বলো তো নাতবৌ—

মানময়ী । (কথা কেড়ে নিয়ে) থাক্ থাক্, আর দরকার নেই ।
এখন আমি চল্লাম, অনেক কাজ ফেলে এসেছি—বল্লাম
মাই নাতবৌকে একটু এগিয়ে দিয়ে আসি—

(প্রস্থান)

দামোদর । আমিও উঠি নাতী—হ্যাঁ, তারটা তুমি করে দাও
এফুনি, আর অমনি ভাড়াটাও—বুঝেচ ? দেয়ী করো না,
অমন ছেলে, আবার কোথাও টেনে নেবে—ভাল জিনিস
পাতে পড়তে পায় না ।

(প্রস্থান)

নীহারিকা । কী তুমি অমন মুখ গোঁজ করে বসে আছ যে—
যেন কতাদায় ! কী—হয়েছে কী ? আমার বাপু অমন
মুখ ভাল লাগে না ! কী—হয়েছে কী ?

মানস। কিছুই না—ভালতো লাগে না, কিন্তু ষা ভোগানটা ভুগিয়েছিলে, রাত নেই, দিন নেই—প্যান্—প্যান্ ! উঃ, আমার প্রাণটা—

নীহারিকা। সে কী আমি ইচ্ছে করে করেছি, দেখতে তো

• বুড়োবুড়ী কী শুরু করেছিল, অতো উড়োতাড়া—

মানস। সে রকম তো এখনো করে, কই এখন তো—

নীহারিকা। এখনকার কথা ছাড়, এখন সত্যিকার মিসেস মুথার্জি—পার্টনারশিপে ! (হাসি) উঃ, মনে পড়ে গেলে এখনও হাসি পায়, চাকরীর খাতিরে—কুই গো ?—দাগা নাকি পাবো না ?—Good conductএর Certificate কোথায়—আরে বাপু আধুনিক ছেলে একটা মেয়েকে এতো কাছে পেয়ে Contractএর terms রাখবে—আর আমার মতো মেয়ে—রূপে, গুণে—

মানস। (স্বগত) হঁ ! যাও না ছেড়ে—বাঁচি বাবা ! আমারিই দোষ, উনি যে গলায় বুলে পড়লেন, তাতে—উঃ, তখন মনে হতো যেন আমি গুঁকে ছাঁকা দিচ্ছি—Prince of walesএর উনি বাক্‌দত্তা ! আরে বাবা—মেয়ে জাত—আজকালকার ছেলে—আর কিছু না শিখুক—ওজাত-টাকে ঠিক শিখেছে—ধরো আর ছাড়া—ঠিক ! প্রেম করো, বিয়ে করো না— ! উঃ আমার idea !—it was heavenly !—আর এ একেবারে গড্ডালিকা !

নীহারিকা। কী—চুপ্ করে রইলে যে—কী ঘুম পাচ্ছে ? তা'লে

ঘুমোও—(মানসের মাথা মূহ মূহ আঘাত করে) “ছেলে
ঘুমলো—”

মানস। না—না ঘুম পাচ্ছে না—হ্যাঁ দেখ, ভাবছি কিছুদিনের
ছুটি নেবো—দেশে একটু জমিজমা ছিল, বারভূতে লুটে
খেল, একটু দেখে আসি—এই মাস খানেকের—

নীহারিকা। বেশ ত, চলো ছ’জনেই যাই। কোলকাতায় আমাদের
বিয়োটো সেরে নেবো—দেড় বছর হলো—আর বেশী
দিন থাকা ঠিক নয়! একটা license—কী বলো?
কখন কী হয়—

মানস। (চমকে) কী আবার হবে?—

নীহারিকা। (লজ্জা) ধ্যেং, জানি না—বাও—যেন থাকা!

মানস। তা আগে আমি ফিরে আসি, তারপর একবার
গিয়ে না হয়—(স্বগত) একবার তো পাড়ি দি, কে ধরে
তারপর! যদি পুনর্জন্ম হয়, এ বেচারী—কেন বাবা!
মানে মানে সরে পড়ি, ভাগ্যে থাকলে চাকরী বহুৎ মিলবে
—আর বউ—? বাংলাদেশে ঐ একটা জিনিসের এখনো
unemployment আসেনি—

নীহারিকা। না—না—আর বার বার নয়! বুড়ো ছাড়ে কী
না ছাড়ে—! আর ঝাখো, এখানে না হয় আর নাই
এলাম, কোলকাতা, কিংবা—খুব দূরে—যেমন ধরো—
নাগপুর—কী লাহোর—কী বম্বে—চেষ্টা করো না! বেশ
হবে—চেনা নেই—শোনা নেই! বাবুলাহাটি আর ভাল

লাগে না—গোঁয়ো—বুঝলে—চল এ চাকরী ছেড়ে দি—
রাজি হও তো আজিই ছাড়ি—

মানস। (স্বগত) হুঁ বুঝেছি—ঠিক হয়েছে! অশেষ চক্রবর্তী
আসার আগেই, উঃ—stone-like womanই বটে!
ফার্নাণ্ডোজের মিসেস হওয়াই উচিত ছিল, কলে থাকতে—
(প্রকাশ্য) আচ্ছা সে দেখা যাবে—এখন চলো চান করি—
নীহারিকা। আমি তো কখন করেছি—যাই ঠাকুরকে দেখিয়ে
দি—তুমি চট করে এসো কিন্তু—

(উভয়ের প্রস্থান)



দ্বিতীয় অঙ্ক

প্রথম দৃশ্য

[দামোদর চৌধুরীর বাগান—খানকতক বেতের চেয়ার—

তিনখানা ছোট টেবিল]

(দামোদর ও রাজেনের প্রবেশ)

রাজেন । কাজটা কী যথার্থ ভাল করলেন ! বিয়ে করেনি—
চারিদিকে মেয়েরা রয়েছেন—আইনে যথার্থ—

দামোদর । তুমি ডোবাবে রাজু ! কী ছেলে জানো ? হীরের
টুকুরো—বিয়ে করেনি ? আরে নাই বা করলো বিয়ে—না
হয় দেখে শুনে এখানেই একটা—মেয়ের তো অভাব নেই
—অমন ছেলে—লোকে পাবে কোথা ! আমারই হচ্ছে
হচ্ছে জামাই করতে—

রাজেন । উঃ—হু—হুঃ—

দামোদর । কী হ'লো—আরে হ'লো কী ?

রাজেন । আজে কিছু না—বুকের সেই যথার্থ বেদনাটা—তা
দেখুন ওই ইচ্ছেটি করবেন না, কোলকাতার যতো ভাল
ছেলে সব যথার্থ চরিত্রশীল, মদ আর বেশা—দিনরাত চুর ।

আজ্ঞে রাতে যথার্থ চিৎপুর দিয়ে হাঁটুন, ছ'ধার দিয়ে ঐ সব হীরের টুকরো—আর ঐ সব বেক্স মেয়েরা দিনরাত যথার্থ এই সব ছেলের পিছনে ফেউ—বিয়েও করবে না—ছাড়বেও না—আর ছেলেরাও যথার্থ—যেন ভূভারতে মেয়ে দেখেনি—ওরা যথার্থ ওপরে হীরে—ভিতরে বিষ ! তা নইলে এখনও কেন এই নতুন মাষ্টারটা বিয়ে করেনি ? বোঝেন ত ? এদের কী মেয়ে জোটে না ? যথার্থ—

নামোদর । আরে তোমার যথার্থ রাখ, ওসবী পুঁথিগত—গল্পই শোনা যায় । ছাখোনা এ ছেলে যা এসেছে—নামেও যা—কাজেও তা—

রাজেন । (স্বগত) তা আগেই জানতাম—এই ভয়েই—কী জানি কে এসে পড়ে—নাঃ, আবার পড়তে হ'লে!—কিন্তু তা না হয় পড়লাম, গ্র্যাজুয়েটও না হয় হলাম—কিন্তু তদ্দিন কী চপলা অপেক্ষা করবে— ? যথার্থ কচু করবে । সামনে থেকেই গুস্ত-নিগুস্ত যুদ্ধ—তায় আর এক হীরের টুকরো—নাঃ—বার জন্তে প্রাক্টিস্ ছাড়লাম, সেও বুঝি—বুঝি কী ঠিকই—

নামোদর । কী রাজু—কী ভাবছ ? নাঃ তুমিই ডোবাবে রাজু ! একেবারে ডোবাবে ! যাক্—সে পরে দেখা যাবে, তুমি বসো ! তাকে আনতে মর্টার পাঠিয়েছি—এই এলেন বলে । মাষ্টার এলো না কেন এখনো—কৈ হয়—

(খটমট্ সিংএর প্রবেশ)

খটমট্ । (সেলাম করে) হজুর !

দামোদর । মাষ্টার সাহেবকো সেলাম দেও—

খটমট্ । জো হকুম্— (প্রস্থান)

দামোদর । আরে রাজু ত্যাখো কী—হ' ইঙ্কুল দিয়ে এবার
বদনকে তাক্ লাগিয়ে দেবো !—ছেলেদের—রাজেন । যথার্থ তাক্ সে একটাতেই লেগেছে—আমারই মাথা
স্বুরে গেছে—আর বেগুন-বেচা বদন । এটা করবার কোন
দরকার যথার্থ ছিল না—আপনার শরীর—দামোদর । আরে তোমরা তো আছ—তোমাদের ভরসাতেই
তো—আর তা ছাড়া ছেলেদের লেখাপড়ার সুব্যবস্থা
বাবুলাহাটিতে ছিলই না । আর একটা হাই ইঙ্কুল—
জেলাতেই মাত্র একটা—ম্যাজিষ্ট্রেট সাহেব তাইতো সেদিন
বলেছিলেন—ইংরেজীটা অতো বড়ো—ঠিক মনে নেই,
মাষ্টার জানে—অর্থাৎ কি—তুমি একটি প্রাতঃস্মরণীয়
লোক দামোদর—এই যে মাষ্টার—বলতো সেদিন—

(মানসের প্রবেশ)

সেদিন ম্যাজিষ্ট্রেট কী বলেছিলেন ?

মানস । You are David Hare of the District—

দামোদর । শুনলে তো রাজু, David Hare—কথাটা ছাই
মনেও থাকে না, তিনি ছিলেন বাংলার লাট সাহেব—

আরে বলবে না—সোজা তো নয়—চল্লিশ হাজার টাকা খরচ করে, পঁচিশটা মাষ্টার এনে, তবে না সরকার মাসে তিনশ' টাকা করে দেবে বলেছে—আরে ওরা গুণেরই কদর করে—কী বলো মাষ্টার ?

রাজেন। আঙ্কে সে তো যথার্থ—আমরাও হোমিওপ্যাথিকের মতো ফোঁটা ফোঁটা রক্ত দিয়ে একে বাঁচিয়ে রাখবো—তবে—, তবে কী জানেন, বেশী লেখাপড়া শিখে যথার্থ ছেলেরা উচ্ছন্ন যাচ্ছে—আমার মতে যথার্থ ম্যাট্রিকুলেশন পাশ করেই—ঐ মটর—এলো বুঝি—

(নেপথ্যে মটরের হর্ণ)

দামোদর। ঠিক হ'য়ে সব বসো—রাজু তুমি গিয়ে গেট থেকে নিয়ে এসো—আমিও যাবো নাকি—

রাজেন। আঙ্কে—আপনি যথার্থ প্রেসিডেন্ট—আপনারা বসুন, আমি গিয়ে—যথার্থ— (প্রস্থান)

দামোদর। ঐ এলো ! ঐ নামলো ! দেখো দেখো মাষ্টার—কী সুন্দর চেহারা ? যেন রাজপুত্র, আর রাজু বলে কিনা—এরা হয় চরিত্রহীন, আরে এরা চরিত্রহীন হয় না—চরিত্রহীন করায়—আমি মেয়ে হ'লে—কী বলো মাষ্টার—ঐ আসছে—

মানস। (স্বগত) হুঁ—ঠিক হয়েছে—খুশান ছুঁড়িটা রূপ দেখে—তায় গুণ ! কিন্তু ছাড়লে কেন ? ভেল্কি—ঘোর ভেল্কি

—হয়তো অত্ন কেউ বাগিয়েছে, জাতেরই দোষ—আচ্ছা
পুরুষকে বিয়ে করা চলে না—?

(রাজেন ও অশেষের প্রবেশ)

রাজেন। (দামোদরকে দেখিয়ে) ইনি হচ্ছেন আমাদের মাননীয়
প্রেসিডেন্ট মহোদয়—founder Manmoyee Girls'
School, Zaminder, President Panchayat, David
Hare of the District—and what not !

(উভয়ে নমস্কার)

আর ইনি—Mr. Manash Mohan Mukherjee, Head
Master, Manmoyee Girls' School, Graduate,
and husband of Mrs. Niharika Mukherjee,
Graduate.

(দু'জনে নমস্কার)

অশেষ। ওঃ, তা হ'লে তো আমরা দু'জন friend. আমার স্ত্রীর
নামও নীহারিকা—

রাজেন। যথার্থ—? আপনি বিবাহিত?—যথার্থ বিবাহিত?

অশেষ। হ্যাঁ, আমি—

রাজেন। উঃ! বাঁচালেন, যথার্থ বাঁচালেন! (স্বগত) কোন্
ঠিকানা—তবুও মন্দের ভালো! একটা safety vulbe !

মানস। (রাজেনকে দেখিয়ে) আর ইনি হচ্ছেন—

রাজেন। রাজেন্দ্রনাথ বাড়রী—Secretary, Manmoyee

Girls' School, Under-Graduate ! নমস্কার ! না
দেখুন আমি যাই, এঁর জিনিস-পত্রগুলো—

(প্রস্থান)

অশেষ । (দামোদরকে) দেখুন আপনার কুপার জন্তে আপনাকে
আমার আন্তরিক কৃতজ্ঞতা—

দামোদর । না—না সেকী বলছেন, আপনার মতো সোনার-চাঁদ
ছেলে—কী বলো নাতী—

অশেষ । দেখুন আমাকে আপনি তুমিই বলবেন, বিশেষ ঠুকে
বখন—আর আমি আপনার নাতিরই বয়সি !—

দামোদর । তা বেশ, বেশ—তুমিই বলবো, লেখাপড়ার এই
গুণ—আমার এ নাতীটিও প্রথম দিন এসেই—হবে না ?
পেটে কিছু থাকলেই এসব আসে !—গিন্নীকে ডাকাই—
তঁার নতুন নাতীকে দেখে যান । ওরে—ও—কে আছিস্,
কর্তা-মাকে একবার এখানে ডেকে দে—

(নেপথ্যে—“আচ্ছা বাবু—”)

গিন্নীর এক নাতী ছিল, দুই হ'লো—তাই বলে মাষ্টার
আদরে বথেরা পড়লো না—ওটা পরিমাণে বেড়ে গেল—
কিন্তু বেশীর ভাগটা নাতবো—হ্যাঁ (অশেষকে) তুমি
নাতবোটিকে নিয়ে এলে না কেন ? ছুটিতে বেশ জমতো
তা হ'লে—তিনিও কী গ্রাজুয়েট—? তা'লে না হয়
আমার ইস্কুলেই—

অশেষ । আজ্ঞে না—সে এই কিছুদূর পড়েছে, অনেকদূর—তবে

বাড়ীতে কিনা—(স্বগত) আনতে বললেই বিপদে ফেলবে দেখছি—

মানস । (স্বগত) হুঁ—আনবেন কোথেকে—? ডিভোর্স রিপোর্টটা—

দামোদর । যাক্ শীগ্গীরই এনো, না হয় মাঝে কিছুদিনের ছুটি নিয়ে গিয়ে—নয়তো আবার এখানে মন টুক্বে কেন?—
রাতিরে আবার আমার মতো হাত্ড়াতে হাত্ড়াতে
বিছানায় বেরাল চেপে ধরবে, হাঃ—হাঃ—

অশেষ । আন্তে না, মানে কী—কোলকাতার মেয়ে কিনা—
পাড়াগাঁ—এই ভয়ে—ওদের একটা বিভীষিকা আছে—

দামোদর । পাড়াগাঁ—বাব্লামহাটি পাড়াগাঁ—ট্রামই নেই, নয়তো
একেবারে কোলকাতা । বিজলী আলো, পাখা, কী নেই ।
আনো নাতবোকে একবার দেখিয়ে দি—

অশেষ । (স্বগত) কী বিপদ ! নাঃ, টুক্তে দেবে না দেখছি—
(প্রকাশ্যে) আগে তো জানতাম না, আনবো বৈকি—
নিশ্চয়ই আনবো, একবার এলে—

মানস । (স্বগত) হুঁ—এ বড় জবর ফাঁদে পড়েছেন বাছাধন—
মানময়ী । (প্রবেশ করে') কিগো, সকাল সকাল—দিব্যি তো
নাতী দাছতে—ওমাঃ—

দামোদর । আরে গিন্নী—এসো—এসো—সোনার-চাঁদ ছেলে—
এও তোমার নাতী ! হীরের টুক্ৰো—লজ্জার কিছু নেই !
মানময়ী । (এগিয়ে এনে অশেষের চিবুক স্পর্শ করলেন—অশেষ

প্রণাম করলো) থাক্—থাক্—আহা হবে না সোনার-চাঁদ,
কী চেহারা? ওগো তোমার ভাগ্যই ভাল, দুই নাতিই
সোনার-চাঁদ হ'লো—

দামোদর। হবে না—এমন গিল্লী বার? কী বলো—মাষ্টার—
আমার গিল্লী কী দেখতে খারাপ—তোমার গিল্লীর চেয়ে
অনেক দেখতে ভালো—

মানস। নিশ্চয়ই—দিদিমাকে আমি আমার দ্বিতীয় পক্ষ—
মানময়ী। দাঁড়াও নাতবৌকে বলে' তোমার দ্বিতীয় পক্ষ
করাচ্ছি! (অশেষকে) তোমার গিল্লীকে, আনলে না
কেন, দুটিতে বেশ—ও বেচারী একা একা!—হ্যাঁ বাবা—
থোকা-থুকু ক'টি—

অশেষ। (স্বগত) এই সেরেছে! (প্রকাশে) সবে সেদিন
বিয়ে হ'লো—তবে—(মুখ নীচু করে)

মানময়ী। হবে বুঝি—! বেশ বেশ! আশীর্ব্বাদ করি একটী
থোকা হোক—(মানসকে) শুনলে তো—তোমাদের যতো
কু-কীর্ত্তি—ও আবার কী ফ্যাসান—? এই বছরই
নাতবৌ-র কোলে একটী থোকা চাই—বলে দিলাম—উঠন্ত
বয়েস—কোল খালি ভাল দেখায় না—একটি হ'য়ে না হয়
না হবে—

মানস। (স্বগত) উঃ! লোকটা আমার বাবা! বেমালুম নির্জলা
মিথ্যে বলে চলেছে—মানস মুখজ্যের কানকাটা ছেলে!
(প্রকাশে) এই যে মিস্ চপলা এসো—কী খবর?

(চপলার প্রবেশ)

চপলা । মেসো, আজ ক্যারমে—(অশেষের দিকে নজর পড়ায় থেমে গেল) ।

মানস । চপলা, ইনি হচ্ছেন তোমাদের ইস্কুলের নতুন মাষ্টারমশাই—
—আর ইনি হচ্ছেন—মিস্ চপলা চৌধুরী ।

চপলা । নমস্কার । কিন্তু ইনি তো আমাদের ইস্কুলের নয়, ইনি তো বয়েজ্ ইস্কুলের—

অশেষ । হ্যাঁ, আমি—তা আপনি কোন্ ক্লাশে পড়েন ? এই গার্লস্ স্কুলেই বৃষ্টি—

চপলা । হ্যাঁ, আমি সেকেণ্ড ক্লাশে উঠেছি এবার ফার্স্ট হয়ে ।

অশেষ । তাই নাকি ? বাঃ, বাঃ ! দাদামশাইয়ের কথা-ভাগ্যও—

দামোদর । আরে ভাই, ওর জন্ত দায়ী এই মাষ্টার—দিনরাত ওকে পড়াচ্ছে—নাতবো গানও—

অশেষ । গানও জানেন নাকি ? বাঃ ! তা'লে তো—(স্বগত)

উঃ, যেন আগুনের ডালি ! নাঃ আর উপায় নেই । এক ফর্টোই যতো গোলমালের সৃষ্টি করলো ! তবুও—উপর উপর যতোটা—(প্রকাশে) তা বিকেলে শুনাতে হবে কিন্তু মিস্—

চপলা । মাসীর শুনবেন না ? তিনি ওস্তাদ—

অশেষ । নিশ্চয়ই, তাঁর কৃপা হ'লে—কী বলেন মিঃ মুখার্জী ?

মানস । নিশ্চয়ই । অঙ্ক বিকেলে আমার ওখানেই চাটা—

kindly. সকলেই আমরা—দাদামশাই, দিদিমা, মিস্—
রাজেনবাবু—আসবেন তো ?

দামোদর। বেশ—বেশ—
মানময়ী। বেশ কাটবে বিকেলটা— } (একত্রে)
চপলা। • আমাকে আবার নেমন্তন্ন ?

(রাজেনের প্রবেশ)

রাজেন। (স্বগত) নাঃ, জালালে দেখছি—ঠিক জুটেছে ! এ-জাত
যথার্থ পুরুষের গন্ধ পায়। যথার্থ কতো কাছে দেখেছ ?
কী হাঁ করে' করে' গল্প, এখনই যেন—(প্রকাশে) এই
যে চপল, কর্তা-মা তোমাকে এফুনি—যথার্থ (মানময়ীর
দিকে চোখ পড়ায়)—(স্বগত) উঃ এফুনি যথার্থ বেকুব—
(প্রকাশে) হ্যাঁ, দেখুন আপনার জিনিস-টিনিসগুলো সব
দিয়েছি ঠিক করে'—যথার্থ একজন স্ত্রীলোক না থাকলে
ঠিক গোছ-গাছ—

চপলা। আচ্ছা আমি গিয়ে ওবেলা সব গুছিয়ে দিয়ে আসবো—
ওসব পুরুষের, চাকরের কাজ নয়।

রাজেন। (স্বগত) যথার্থ এ আবার খাল কেটে—কী বলতে কী
হয়—(প্রকাশে) না, তোমাকে আর—আমি সব ঠিক-ঠাক্
—তোমাকে আর যেতে হবে না। আমি একাধারে যথার্থ
পুরুষ ও মেয়ে—দুইই। (স্বগত) আবার এটাকেও—উঃ,
এ-জাত 'তিমন্ চাখা', যথার্থ—(প্রকাশে) তা এবার

আপনি উঠুন, বেলা হয়েছে, বেশীক্ষণ এখানে বসে থাকা safe নয়, অর্থাৎ যথার্থ 'ট্রেন জার্নি' করে—একটা ঘুম দরকার।

দামোদর। এবার তা'লে তুমি ওঠো ভাই।

মাননয়ী। চান করে' এখানেই—এখানেই থাকে কিন্তু।

রাজেন। উনি আবার কষ্ট করে'—তার চেয়ে এবেলা ভাতটা ওঁর বাসায়—মানে ট্রেন জার্নি কিনা—তারপর ওবেলা থেকে যথার্থ সব স্বব্যবস্থা—ঠাকুর, চাকর ready। (স্বগত) কতো আর ঠা'কাবো।

মাননয়ী। না না, তুমি চলেই এসো ভাই, আমি নিজে কাছে বসে খাওয়াবো।

রাজেন। (স্বগত) হুঁ! যথার্থ মেয়েটার মাথা খাওয়াবেন যেন জামাই! উঃ, আগাকে আর—

মানস। তা'লে আমি যাই—আসবেন ওবেলা—মিঃ চক্রবর্তী, রাজেনবাবু আসবেন নিশ্চয়ই—এই একটু চায়ের ব্যাপার মিঃ চক্রবর্তীর অনারে—নমস্কার। (প্রস্থান)

রাজেন। (স্বগত) যথার্থ যাত্রা সুরু হ'য়ে গেল—আর আমার বাবারও সাধি নেই—নাঃ এবারই ছেড়ে—

দাদোদর। আচ্ছা চলি তা'হলে— }
মাননয়ী। চট করে এসো বাবা। } (একত্রে)

(উভয়ের প্রস্থান)

অশেষ। তা'লে হিঁস্, আসবেন আপনি?

চপলা। দেখুন আমাকে আপনি ‘তুমি’ই বলবেন। আমার বড়
লজ্জা করে—বয়সে তাছাড়া—

অশেষ। বেশ বেশ, thanks.

রাজেন। হ্যাঁ, তা মিঃ চক্রবর্তী চলুন, আপনাকে দেখিয়ে
গুনিয়ে—

অশেষ। Oh ! Excuse please ! চলুন।

রাজেন। আপনি যথার্থ একটু এগুন, আমি একটু—এই—
(কাশি) এই মিস্—

অশেষ। আচ্ছা, আচ্ছা।—আচ্ছা মিস্—

(প্রস্থান)

রাজেন। চপল—বাঃ কী সুন্দর ! যথার্থ তোমাকে এখন যা
দেখাচ্ছে চপল, যেন, যেন—নাঃ উপমা নেই, কী বলে— ?

চপলা। (হেসে) কেন বলুন, এক ঝাড় কালো মল্লিকা—আচ্ছা
রাজুদা—

রাজেন। আমায় ডাকছ চপল ? আমায়—

চপলা। (খিল্ খিল্ করে হেসে) হ্যাঁ, কী হলো আপনার ?—
আচ্ছা রাজুদা, ফার্ট্ ক্লাশ এম্-এ কাকে বলে ? বাবা
বলছিলেন—কী সুন্দর চেহারা আমাদের নতুন—

রাজেন। (স্বগত) এই রে, সেরেছে। রূপ, রূপ ! কেন বাবা !
—নাঃ জাতেরই দোষ—

চপলা। কই বললেন না ?

রাজেন। কী চপল ?

চপলা। ছাত্।

(প্রস্থানোত্তম)

রাজেন। (তাড়াতাড়ি পথ আটকিয়ে) না, না। যথার্থ যেও না

চপল—হ্যাঁ, এই বলছি, ফার্স্ট ক্লাশ ? মানে—যথার্থ যারা
দিনরাত মদ খেয়ে যথার্থ খারাপ জায়গায়, এই বেস্তা বাঁড়ী
পড়ে থাকে, এই তারাই—তথ না লোকে বলে ‘ফার্স্ট ক্লাশ
বদমায়েস্’—

চপলা। এম্-এ, মানে ?

রাজেন। (স্বগত) তোমার মাথা ! (প্রকাশে) এম্-এ, মানে,

(একটু ভেবে) মাষ্টার অব্ এডাল্টি।

চপলা। মানে ?—আপনার কথাই বোঝা দায়।

রাজেন। যথার্থ আমিই একটা দায় হ’য়ে উঠেছি—মানে ? হ্যাঁ,
দাঁড়াও বলছি—যেয়ো না চ-প-ল। (কাতর কণ্ঠে) মানে,
এই—অসচ্চরিত্র। তুমি ঐ মাষ্টারের সঙ্গে যেন বেশী
মিশো না, বিশেষ একা একা—যথার্থ কর্তাবাবু ওটা পছন্দ
করেন না।

চপলা। (হেসে) দূর, বাবা ওকে আনালেন, কতো সুখ্যাতি—
আপনি মানে জানেন না রাজুদা—আমি যাই।

(প্রস্থান)

রাজেন। নাঃ যথার্থ ভরাদুবি। যাই দেখি—

(প্রস্থান)

দ্বিতীয় দৃশ্য

[মানসমোহনের ড্রইং-রুম। সন্ধ্যা সাতটা, সাড়ে-সাতটা।

ড্রইং-রুমটি আধুনিক রুচিতে শ্রী-সম্পন্ন]

(অশেষ ও রাজেনের প্রবেশ)

রাজেন। এইটে হচ্ছে মিঃ মুখার্জীর বাড়ী। ইনি দিব্যি ছিম্ছাম আর যথার্থ হবে না কেন? স্ত্রী-ভাগ্যে যথার্থ ইতি—
পুরাণেও বিরল।—কই হে হারু—যথার্থ ও হারু-উ,
তোমার বাবুকে—এই যে মানসবাবু এসেই পড়েছেন।

মানস। আসুন, আসুন মিঃ চক্রবর্তী—বসুন। ওরে হারু, তোর
দিদিমণিকে খবর দে—

(সকলে বসলেন)

অশেষ। বাঃ, আপনার কোয়ার্টারটি বেশ—

রাজেন। এটা যে কর্তাবাবুর বাগান-বাড়ী ছিল। যথার্থ ঐ যে
গুঁরা সদলবলে (স্বগত) উঃ, দেখেছ চপলার সাজগোজ—
আর আমার বাড়ীতে, কোমরে আঁচল জড়িয়ে, যেন—
নাঃ—

(দামোদর ও চপলার প্রবেশ)

দামোদর। এসেছ? হ্যাঁ, তা আমার একটু দেরী হয়েছে—না?
এই বেটির জন্তেই হলো, ওর সাজই হয় না—ওরে হারু,
একটু তামাক আনতে বল দেখি।

মানস। দিদিমা কোথায়, দাদামশাই? তাঁকে—

দামোদর। ও—হ্যাঁ, তার মাথাটা বেজায় ধরেছে, বামী বোধ হয়
মাথায় তেল ঠাস্ছে, বোধ হয় আসতে পারবে না—তা,
নাতবো কই? নতুন মাষ্টারকে দেখাও, কি জিনিস আমি
পেয়েছি!

মানস। হ্যাঁ—আসছে, একুনি—এই দশ মিনিটেই—

রাজেন। (স্বগত) কী মানিয়েছে চপলাকে—আচ্ছা, আমার
চেহারা কী ষথার্থ মোস্তার মোস্তার—? উঃ—কী বাড়ছে,
যেন পুঁই-ডগা—নতুন মাষ্টার—ষথার্থ হু'জনে চোখাচোখি,
ঐঃ—একটু হাসলো বুঝি?—নাঃ, গেল গেল—(প্রকাশ্য)
তা, তা—চপলা তুমি একটু ভেতরে যাও না, তোমার মাসী
ষথার্থ একা একা—

চপলা। বাঃ—রে—মাসী বোধ হয় কাপড় পরছেন, এখন
আমার যাওয়াটা,—আচ্ছা মাষ্টার-মশাই আপনি গান
জানেন, না—? গান্না একটা—

রাজেন। (স্বগত) কী ঢং—এঃ—যেন নাচবেন! ষথার্থ বুকটার
মধ্যে—

অশেষ। আমি—? নাঃ—আমি ও বিষয়ে একদম নাচার—
তোমারই একটা হোক—যতোক্ণ মিসেস্‌ মুখার্জি না
আসেন—

চপলা। নাঃ—আমার গলাটা বিশেষ ভাল নেই—আমি বরং
আপনার বাসায় গিয়েই শুনিয়ে আসবো। এই তো

~ আপনার বাসা—হরদম্‌ যাবো—!

রাজেন। (স্বগত) তা আর যাবে না? যথার্থ অছিল ঠিক শিখেছ—! জাতেরই দোষ—(প্রকাশ্যে) ঐ যে—বাঃ, মিসেসকে কী সুন্দর—(হঠাৎ থেমে)—ইনি হচ্ছেন মিসেস মুখার্জি, বি-এ, আর ইনি মিঃ চক্রবর্তী, যথার্থ হীরের টুকরো—

(নীহারিকা অশেষকে নমস্কার করলো, অশেষও—)

অশেষ। তুমি—!—!—! তুমি?—আপনি—? (স্তম্ভিত হয়ে) আপনি এখানে—? (স্বগত) সমস্ত পৃথিবীটা ঘুরছে, এরা শেষে কী—একী—? (অশেষ অজ্ঞানের মতো হ'য়ে পড়লো) না দেখুন, আমার শরীরটা বড় অস্থির করছে, আমায় একটু শুইয়ে দিন্—(অজ্ঞান)

দামোদর। কী হ'লো—কী হ'লো! আরে রাজু ধরো ধরো—না—না, তুমি শিগ্গীর যাও—ডাক্তার ডেকে আনো, এখন এই শিবপদকেই ডাক—মটর পাঠিয়ে দাও সহর থেকে—যাও, দাঁড়িয়ে থেকো না!—নাতী, ধরো একে গুলিয়ে দাও, ঐ চৌকিটায়—(সকলে ধরাধরি করে অশেষকে সেই ঘরে একখানা খাটে শুইয়ে দিলো)

(রাজেনের প্রস্থান)

মানস। (স্বগত) হুঁ—ঠিক হয়েছে! দোঁখ কোথাকার জল কোথায় যায়? গুঁরও মুখখানা এতোটুকু—(প্রকাশ্যে) ওগো, দেখো—তুমি এঁকে দেখো—হ্যাঁ, স্মেলিং সন্ট্‌টা শোঁকাও—আচ্ছা হঠাৎ এরকম হবার—?

নীহারিকা। তাই তো আমিও ভেবে পাচ্ছি না—হয়তো হাটের
অসুখ আছে—চপল—তুমি মাথায় জলপটিটার ওপর একটু
একটু জল দাও দেখি—আমি পায়ের দিক্‌টায় বসি—

(অশেষের রীতিমত সেবা চলতে লাগলো,

সে তন্দ্রাচ্ছনের মতো পড়ে'—)

অশেষ। (মোহের আবেগে) সুধীর—এঁরা তোর বান্ধবীকে
detain করেছেন—illegally detained in Person !—
ই্যা দেখ্—ফটোটা তোকে—

(ডাক্তারসহ রাজেনের প্রবেশ)

দামোদর। (ব্যস্ত হ'য়ে) ওহে শিবপদ—দেখতো কী হ'লো—
ভাল ছেলে, কথাবার্তা বলছে—হঠাৎ নাতবৌকে দেখেই
অজ্ঞান—কী সব স্বাস্থ্য !

(ডাক্তার অশেষকে পরীক্ষা করতে লাগলেন)

রাজেন। (স্বগত) নাঃ—জ্বালালে দেখছি—চপল যথার্থ কতো
কাছে বসেছে, মাষ্টারটা আবার একখানা হাত বুকের
ওপর, যথার্থ—থিয়েটারি ঢং—কোলকাতার ছেলে—আরে
অসুখ-বিসুখ সব বুজুকি—কাঁকতালে কাছে পেয়ে কিছু
বাগিয়ে নেবার মতলব—নভেলে অমন—

অশেষ। উঃ—একটু জল !—চপল—আমি মিথ্যাবাদী—

(চপলা তাড়াতাড়ি জল দিয়ে, আঁচল দিয়ে

মুখটা মুছিয়ে নিলো)

রাজেন। (স্বগত) কী আদর ! নাঃ—যথার্থ ! আমি সেবার
চুল্‌কানিতে অতো দিন—আঁচল দূরে থাক্—বলে—‘কী
নোংরা’ ? যথার্থ ওসব—

দামোদর। রাজু মোটর পাঠিয়েছ— ?

রাজেন। ও—যাঃ—যথার্থ ভুলে গেছি, মানে—এদের একা
ফেলে—বেশীক্ষণ বাইরে থাকতে সাহস হ’লো না—

দামোদর। নাঃ—তুমিই ডোবাবে রাজু—ইস্কুলটাকে—

রাজেন। আজ্ঞে ইস্কুল তো যথার্থ—না যাই—

• (প্রস্থান)

দামোদর। কী ডাক্তার—কী দেখলে ?—বলি ব্যারামটা কী ?
হঠাৎ এমন—

ডাক্তার। ভয়ের কিছুই নেই—একটু পরেই জ্ঞান হবে, তখন
একটু গরম তুখ দেবেন—আর রাত্তিরে একজন কাছে
থাকবেন—বেশীজন থাকবেন না। ঘুমের ব্যাঘাত হয় না
যেন—ওষুধ পাঠিয়ে দিচ্ছি—

(প্রস্থান)

দামোদর। (উদ্বেগে) একটু তাড়াতাড়ি পাঠিও—আর তা’লে
রাজেনকেও বারণ করে দাও সহরে গাড়ী পাঠাতে। আজ
কেমন থাকে দেখে—কাল সকালে বরং— ! নাতবৌ—
আমরা বরং যাই—মিছে এখানে ঝামেলা করে তো লাভ
নেই—ওর এখন পুরো বিশ্রাম দরকার—চপলা বরং
থাক্—রাতে নাতবৌ একা একা—হ্যাঁ, দেখ নার্সিং যেন
খুব ভাল—এই যে রাজু—

(রাজেনের প্রবেশ)

রাজু তুমিও এখানে থাক—ঐ বাইরের ঘরটায় শুয়ে—
যদি দরকার-টরকার—আর চপল আর নাতবৌ রাতে
ওকে নার্সিং করবে—ঘণ্টায় ঘণ্টায় ওষুধ—তুধ—দেখা-
শুনা— !

রাজেন। (স্বগত) নাঃ—রাতে অন্ধকার ঘরে চপলকে একা
একা বথার্থ ওই—কোলকাতার ছোঁড়াটার সঙ্গে ?—নাঃ—
(প্রকাশ্যে) দেখুন—এই বথার্থ চপলার থাকার কোন—
এই আমিই তো রইলুম—দেখা-শুনা বথার্থ সব—চপলকে
নিয়ে যান্—কর্ত্তা-মা আবার একা একা—

দামোদর। না—না—ও থাক্—নাতবৌকে একা অত রাত—
চপলা। হ্যাঁ বাবা—আমি থাকি, সমস্ত রাত আমি ঝুঁকে
দেখবো—

রাজেন। (স্বগত) বথার্থ তা আর দেখবে না—এই তো সুযোগ
—হুঁ—ভেতরে রস বেশ বথার্থ ভরে' উঠেছে—

দামোদর। তাই থাক্ মা—হ্যাঁ, দেখ নাতী, রাজু—হুঁজনকেই
বলে যাচ্ছি, দরকার হ'লেই আমাকে ডাকবে—তা সে যত
রাতই হোক্—

মানস ও রাজেন। নিশ্চয়ই—নিশ্চয়ই—

(দামোদরের প্রস্থান)

মানস। (স্বগত) এইবার একবার দেখি জাল ফেলে—কী

ওঠে— ! কত জল ! জবরদস্ত মেয়েমানুষ—আরে বাবা
তাইতো বলি ফার্মাগিজের মতো brute লোক—তার—
তার কাছে টাকা বাগিয়েছিল—ও রাস্কেলটার কাছে হাত
পাতলে কী করে—আই ওয়ান্ডার !—আরে—কী করে ?
এরা সব পারে ! ও মুখেরই গুণ—

নীহারিকা । (একটা কাপ্ অশেষের মুখের কাছে ধরে) নিন্—
এটুকু খেয়ে ফেলুন দেখি—চট্ করে—হ্যাঁ, তা'লে শরীরে
একটু জোর পাবেন—এটুকু ? ওভাল্‌টিন্ । হ্যাঁ—এই
তো—লক্ষ্মী ছেলে !—ডিগ্রি নিয়েছেন, বিশ্ব-বিদ্যালয়কে
প্রাণ দিয়েছেন—আচ্ছা দেখুন, আপনি তখন সুধীর—
সুধীর করছিলেন—তাকে একবার খবর দেবো—অবিশ্বি
আর ভয় নেই ।

অশেষ । না—না ! অমন কাজও করবেন না, সে কী আছে— ?
মানস । (স্বগত) সুধীর ? সবৎসা নাকি ইনি ? বিচিত্র নেই—
বৎসা হওয়া আজকাল সম্ভা কতো—ওটা গায়ের ব্লাউজ্—
সময়ে অসময়ে কাজ দেয়—(প্রকাশে) (অশেষের বিছানায়
বসে') আচ্ছা মিঃ চক্রবর্তী, হঠাৎ এরকম আপনার— ?
হার্ট ট্রাব্ল্ আছে নাকি ?—

অশেষ । না দেখুন—ষোল বছর অব্ধি ঠাকুমা'র দুধ খেয়েছি—
তখন ফার্স্ট ক্লাসে পড়ি—ইস্কুল ষাচ্ছি—চুক্ চুক্ করে'
খেয়ে গেলুম—(নীহারিকা ও চপলা একটু হেসে লজ্জিতা
হ'লো)—ভালো ছেলে !—তাই, অম্বান্ বা স্থানাটোজেনের

সে advertised শক্তি আর পেলাম না ! হলাম পুরো-
দস্তুর বাঙ্গালী—

রাজেন। যথার্থ আমিও অনেক দিন অবধি—ঐ কী বলে—
মা'র ঐ ইয়ে খেয়েছি—আজকাল—এই চপলও যথার্থ
অনেক দিন—হ্যাঁ, তারপর—

অশেষ। ঠাকুমা'র দুধ বোঝেন ত ? সেই এইটিন্থ্ সেনচুরির
দুধ—পেলাম সেই সব আইডিয়াজ্—কুসংস্কার, পৈতের
বহর, বংশের অশ্রুতপূর্ব্ব, অভূতপূর্ব্ব গাঁজাখোরী কীর্ত্তি—
যেন একটা বাদশাহ বংশ ছিল—সব চেয়ে dangerous যেটা
পেলাম—সেটা ভুতের ভয়—সেটি তিনি তাঁর খুলিটি উজাড়
করে—হৃদয়ের সঙ্গে দিলেন—(সকলেই হেসে উঠলো) কী
সব বিভিন্ন ideas ; তাদের আকার, তাদের গল্প—এম্-এ
পাশ করেও অতো পাইনি—

মানস ও নীহারিকা। এখনো আছে নাকি—এই বয়সে— ?

(চপলা একটু মানসের গা ঘেঁসে বসলো)

রাজেন। ঐ ভয়টি আমার নেই—বিশ্বাস করিনে—আর যথার্থ
নিজেরাই এক একটি—(স্বগত) নাঃ দেখেছ—ছুঁ ডি যেন
যথার্থ মা'রটার কতো—কতো—

মানস। কী, চপলার ভয় করছে নাকি ?—ভয় কী ? এতোগুলো
ব্রাহ্মণ থাকতে ? হ্যাঁ, আচ্ছা আজও কী সেই জন্তাই—

অশেষ। ঠিক তাই ! ঐ যে সূর্যীরের নাম শুনলেন না ? ও
বেটাই আমাকে খেলো—যতো নষ্টের মূল ! সেবার গেছি

কানপুরে এক আত্মীয়ের বাসায়—একদিন পায়খানায় বসে—
—হঠাৎ সামনে সুধীর এসে দাঁড়ালো। স্থান-কাল ভুলে
গিয়েছিলাম, কারণ, পায়খানায় বসে' একটা problem
solve করছিলাম—ওটা আমার চিরদিনের অভ্যাস—হয়ও
জলের মতো—

রাজেন। ওঃ, আপনার সঙ্গে সব মিলছে দেখছি, যথার্থ ঐ
ডিক্রিট বাদ—আমি ঐ ওখানে বসে সব ভেবেনি—বাইরে
সময় কই? নিজের যথার্থ জিনিস সামলাতে সামলাতেই
—সব যেন শকুনি। হ্যাঁ তারপর—

অশেষ। ভাবলাম হয় তো হবে—অমন ও করতো, সব চেয়ে
intimate কিনা, মেসের বাথ-রুমে পাঁচিল টপ্কিয়ে অনেক
সময় বেকায়দা সময়ে এসে পড়েছে—‘যাঃ, তোর স্থান
অস্থান নেই—’ বলতেই দেখি নেই,—তারপর বুঝতেই
পারছেন? ঠাকুরা’র দুধ কাজ করলো। তার পরদিন
শুনি সে নেই।

নীহারিকা। তা আজকে আমার মধ্যে সুধীরের মূর্তি দেখলেন
নাকি? ও বাবা, তা’লে তো ওঝা ডাকতে হয়—(হাসি)

অশেষ। না—না, ব্যাপার কী জানেন মিসেস—আচ্ছা আমি যে
আমার স্ত্রীর ফটোটা পাঠিয়েছিলাম, সেটা আছে?

মানস। ফটো? }
নীহারিকা। কই নাঃ! } (একত্রে)

রাজেন। পাঠিয়েছিলেন? যথার্থ বাঁচিয়েছেন?

অশেষ । পান্নি—রেজিষ্ট্রারি করে—

মানস । না, পাইনি তো ! তা'লে misdelivery হয়েছে—আরে মশাই পাড়ারগায়ের পিওন—ওঁর চিঠি দিয়ে আসে প্রায়ই নীহারকদিনকে, সে শেষে ফেরৎ ছায় । আহা, দেখুন তো না জানি কার হাতে পড়েছে—

রাজেন । ঠিক তাই, আহা দেখুন তো ? যে নারী-নির্যাতনের ধুম পড়েছে—ভদ্রমহিলার হয় তো—যথার্থ কোন্ গুণ্ডার হাতে পড়েছেন তার ঠিক কী ?

অশেষ । সত্যিই পান্নি ?

মানস । নাঃ, আপনার দরখাস্ত একটা লম্বা খামে পেলাম,—কই কোন ফটো তো—নাঃ, সব আপস আমার হাতে—কী বলেন রাজুবাবু ? যাক্ এ আর কর্তাকে জানিয়ে কাজ নেই—আবার একটা বেগুনের দরের মতো হৈ-চৈ করবেন—

রাজেন । যথার্থ বউ থাকলে ফটো আবার হবে ।

অশেষ । .(স্বগত) উঃ খোদা, বাঁচালে ! এই ছুদিনে চাকরীটা—
আঃ ! (প্রকাশে) হ্যাঁ, দেখুন আমার স্ত্রীর নামও নীহারিকা, আর দেখতে হুবহু—এই মিসেস্—excuse me please, একেবারে to each line !—মানে আপনি মিঃ মুখাজ্জী, ছ'জনকে একসঙ্গে দাঁড় করিয়ে দিলে ধরতে পারবেন না, বেছে নিতে পারবেন না,—হয়তো আমারটিকে নিয়ে—(সকলের হাসি) তাই হঠাৎ আপনাকে দেখে,

সুধীরের case মনে পড়লো। তাঁর শরীর ভাল দেখে আসিনি—মানে in family way কিনা—
নীহারিকা। তা'লে তো আজই একটা খবর নিতে হয়,—আচ্ছা সকাল হোক একটা টেলিগ্রাম করে দেওয়া যাবে।—আচ্ছা আপনি এখন একটু ঘুমোন দেখি, ভয় নেই, আমরা এই পাশের ঘরেই আছি, দরকার হ'লেই ডাকবেন—বুঝলেন, কোন বিধা করবেন না? আর রাজেনবাবু এই মেঝেতেই শুচ্ছেন। ভয়ের কিছু নেই—ঘুমোন।
রাজেন। (স্বগত) যাক বাঁচালেন! চপলা থাকলেই—উঃ, অন্ধকার ঘর, ভাবতে পারিনে, তবুও আমি থাকবো—বেশী বাড়াবাড়ি করতে পারবে না, যথার্থ—

(নীহারিকাদের প্রস্থান—রাজেন মেঝেতেই একটা বিছানা পেতে শুয়ে পড়লো)

[সেই ঘরই—সুদূর গভীর রাত; এক-চাপ নিবিড় অন্ধকারে ঘরটি আরো স্তব্ধ। বারান্দার একটি সবুজ স্ক্রীণ আলোতে ঘরের অন্ধকার দূর হয়নি, তবে বিভীষিকা ভেঙ্গেছে—মানুষে মানুষে পার্থক্য বোঝা যায়। তীক্ষ্ণ শীত; চৌকীর ওপর অশেষ অঘোরে ঘুমিয়ে আছে, নীচে মেঝেতে শুয়ে রাজেন—ঘুমোয়নি, কারণ মাঝে মাঝে নড়ছিল। মানসের ঘরে যাবার দরজায় একটা ভারী পর্দা ফেলা। ঝাঁক দিয়ে মাঝে মাঝে এক এক টুকরো স্তম্ভিত আলো ছিটকে আসছে।]

রাজেন। নাঃ, যথার্থ ঘুমোবার কী যো আছে,—এদিকে ঘুমে চোখ ভেঙ্গে আসছে—কাঁহাতক আর জেগে থাকা যায়—

চোখের ছ'পাতা এক জায়গায় করেছি কী যথার্থ হয় তো এসে জুটবে চপলা, হয় তো ঐ পাশের ঘরে জেগেই আছে, চুপচাপ্ এসে—কিন্তু আমি এখানে জলজ্যাস্ত মানুষটা যথার্থ রয়েছে, তা সত্ত্বেও ? কোন ঠিকানা—অন্ধকারে ছ'জনে যথার্থ কিছু একটা করলেও, কী যথার্থ আমি কিছু বলতে পারবো ? সোজা নাকের ওপর—নাঃ, একটু উঠে দেখি—(একটা চাদর জড়িয়ে উঠলো—অশেষ ঘুমিয়ে আছে কিনা দেখল—পর্দা দিয়ে উঁকি মেরে মানসের ঘরটাও দেখে শিলো) যাক্, অশেষ-মাষ্টার ঘুমিয়েছে—আর ঐ ঘরে ওরা। (পর্দার ফাঁকে দেখে) ঐযে যথার্থ চপলা শুয়ে—উঃ, কী সুন্দর দেখাচ্ছে, যেন—যেন একটা সাদা নরম কোল-বালিস—যথার্থ মাষ্টারনী জড়িয়ে আছে তাকে—আমি যদি এই সময়ে মাষ্টারনী হতাম—উঃ, যথার্থ আমি আর ভাবতে পারছি না—নাঃ একটু কাছে গিয়ে দেখে আসি। (পর্দাটা সরিয়ে দিলো, চপলার খাটের কাছে গিয়ে একদৃষ্টিতে তার দিকে চেয়ে রইল)—(ফিস্ ফিস্ করে) এই যে চপল—আমার চপলা, চপলা যথার্থ আমার, সে চপলা আর নেই, যথার্থ সেই ছোট্ট মেয়েটি আমার গলা জড়িয়ে ধরে যথার্থ বলেছে 'রাজুদা, ঐ আমটা পেড়ে দাওনা' আম পাড়তে গিয়ে কন্ পড়ে, চোখের কোণে আমার সে কী ঘা—যথার্থ এক মাস ঘি গরম দিতে হয়েছিল—আর এখন যথার্থ একটি আস্ত যুবতী ! কেমন

গোল গোল হাত-পা—মুখখানা কেমন—(হঠাৎ চপলা পাশ ফিরে শোয়াতে রাজেন চম্কে উঠলো) না যাই, আবার কেউ জেগে গেলে মুন্সিল বাধবে। (বেরিয়ে এসে পর্দাটা সরিয়ে দিয়ে শুয়ে পড়লো) নাঃ, যথার্থ আর ভয় নেই—সব ঘুমিয়ে আছে। এই ফাঁকে একটু ঘুমিয়ে নি।

(রাজেন প্রকৃতই ঘুমিয়ে পড়লো)

অশেষ। (ঘুমের ঘোরে) আঃ—মাগো! সূধীর, মাইরি তোর plan—

(চপলা দ্রুতপদে সন্তর্পণে এঘরে এলো—পর্দাটা সরিয়ে)

চপলা। (মাথার কাছে বসে,—মাথায় হাত বুলোতে বুলোতে)

কী মাষ্টার-মশাই কী—কাকে ডাকছেন ?

অশেষ। (হঠাৎ জেগে) কে ? মিসেস্ মুখাজ্জী ?

চপলা। না, আমি চপলা। আর একবার ওষুধ খাবার সময় হয়েছে যে—দেবো ?

অশেষ। দাও—তুমি কী সমস্ত রাত জেগে আছ নাকি ?
মিছিমিছি—

চপলা। (ওষুধ ঢেলে দিয়ে) না—না, আমি এক্ষুনি 'এলাম—আপনার কথা শুনে'। এখন কেমন বোধ করছেন মাষ্টারমশাই ? কিছু খাবেন ? এক কাপ ওভালটিন তৈরী করে দেবো ?

অশেষ। না না, এতো রাত্রে ! গুঁরা কোথায় চপলা ? হ্যাঁ, দেখো একটু মাথায় হাতটা বুলিয়ে দেবে—বড় ঝিম্ ঝিম্ করছে।

(চপলা মাথার কাছে বসে চুলের মধ্যে আঙ্গুলের খেলা করতে লাগলো) আঃ, বাঁচলুম, মাথাটা বড় কেমন করছিল চপলা । (স্বগত) একেই বলে দৈব-দ্রবিশপাক ! প্লান্ আটতে গিয়ে চপলাকে পেয়েও পেলাম না—যাক্, চাকরীটা টিকলে ‘ধরি যাছ না ছুই পানি’ পলিসি ফলো করা যাবে । সূধীরকে একবার আনা যাবে—এমন জিনিস অথচ সহরের ঘোর-প্যাঁচ নেই । (প্রকাশে) আচ্ছা চপল, তুমি কী ছেলেবেলায় খুব দুটু ছিলে ?

চপলা । কেন ? বারে—খুব তো প্রশংসা-পত্র দিলেন ?

অশেষ । না—না, তোমার নাম চপলা কিনা তাই, আর মেয়ে দুটু অর্থাৎ চঞ্চলা হওয়াই ভাল—আমি খুব ভালবাসি—

রাজেন । (হঠাৎ জেগে শেষের শব্দ দুটোই শুনতে পেলো)

(স্বগত) যথার্থ ধরেছি ! রাতদুপুরে ‘ভালবাসি’ ? ঠিক চপলা ! (প্রকাশে) কী মিষ্টার চক্রবর্তী—ভুল বক্ছেন নাকি ? যথার্থ (উঠে) ওকে ? যথার্থ পাশে বসে’ ?—মিসেস্ মুখার্জী যথার্থ ?

চপলা । না রাজুদা, আমি ! ওর মাথাটায় একটু হাত বুলিয়ে দিচ্ছি ! বড় নাকি অস্থির করছিল !—এখন আরাম লাগছে মাষ্টার-মশাই ?—একটু—

রাজেন । যথার্থ—লাগছে ! তুমি যথার্থ খুব ভাল মাথা মেসেজ্ করতে পার—(স্বগত) যথার্থ কখন উঠে এসেছে— ? নাঃ—পাহারা দিয়ে কী হবে— ? ‘সিংকিং সিংকিং যথার্থ

ড্রিংকিং ওয়াটার—’ আমার পালা শেষ হয়েছে—যথার্থ মোস্তারিই খেলো—এর চেয়ে যদি বাব্বী রেখে কবিও হতাম—(প্রকাশ) তা চপল—তুমি যথার্থ আর রাত জেগো না—আবার তোমার শেষে—হ্যাঁ, আর দেখো অতো কাছে যথার্থ বসো না—ওতে ঠর বিদ্রিং ডিফিকাল্টি হয়, তা তুমি বরং শুতে যাও—আমি যথার্থ সব সেরে দিচ্ছি— !
 শেষে । হ্যাঁ—তুমি শুতে যাও চপলা ! আমি এখন বেশ আছি !
 (চপলার প্রস্থান)

আপনিও শুয়ে পড়ুন রাজেনবাবু—আমি ঐখন ঘুমবো—
 আর কোন ট্রাবল্ নেই—

রাজেন । আচ্ছা—তা দেখুন, দরকার হ’লে আমাকেই ডাকবেন—যথার্থ আর কাউকে ডাকবেন না—অর্থাৎ আমি কাছেই আছি, আর অল্‌ওয়েজ্ জেগে—আমি কী ঘুমিয়েছি ভাবছেন ? সব দেখেছি—চপলা এলো যথার্থ তারপর—হ্যাঁ, ঘুমিয়ে পড়ুন । (স্বগত) নাঃ—আর ঘুম নয় ! যথার্থ জেগে পাহারা দেবো—আর কতোই বা দেবো—টান্ হু’দিকেই, যথার্থ ইস্কুল—ইস্কুল— ! আমার বাপের পিণ্ডি ! যথার্থ বাপ্ মরলেও এতো হুঃখ হয়নি—ইন্সিওর ছিল ! পঞ্চভূতের জীবন—ও বাবেই—হুঃখ নেই, টাকা পেলাম কিছু কড়্‌কড়ে—পিতৃশোক ভুলিয়ে দিলে—কিন্তু চপলা গেলে— ? আচ্ছা যথার্থ—এই—এই ভালবাসার ইয়ে ইন্সিওরড্ হয় না ? উঃ—হ’লে পাই পাই করে কোম্পানি

বড় হোয়ে যেতো—কোলকাতায় অটেল ! অটেল ! আমি
 হতাম যথার্থ পলিসি নম্বর ‘ওয়ান’ ! নাঃ—ঘুমে যথার্থ
 চোখে ভেঙ্গে আসছে—কিন্তু ঘুমলেই— ! দি আইডিয়া—
 যথার্থ কী মাথা ! ঐ দরজাটা বন্ধ করে’ যথার্থ ছিটকিনি
 বন্ধ করে দি—উঃ আগে যদি করতাম—মাঝের ঐ যথার্থ
 love sceneটা হ’তো না—একেই বলে ভবিতব্য—নয়তো
 রাজেন বাড়রীর ভুল !

(রাজেন উঠে গিয়ে দরজার হুকটা বন্ধ করে’
 এসে, শুয়ে পড়লো)

তৃতীয় দৃশ্য

[মানসের শোবার ঘর। সময় অপরাহ্ন, গোখুলির তীব্রচ্ছটা তখনে’
 দিনের রেশ রেখেছে—তবে তার উগ্রতা নেই। হারু তার
 সে-ঘরের বৈকালিক কাজগুলো সেরে রাখছিল ;
 হাতে কাজ—মুখে তার গান]

হারু। (গান—অদ্ভুত সুর—বিস্মৃত ভাষা)

চেয়ো না—সুনয়না—আর চেয়ো না—

ও নয়ন পানে—(বলি হায়রে—এ—)

(ও) চোখে তার সুরমা আঁকা—চাউনি বাঁকা—

তা—না—নে—এ—এ

চলে নীল সাড়ী—নিঙ্গাড়ি নিঙ্গাড়ি—

পরাণ সহিত মোর—(আ—হাঃ)

(নীহারিকার প্রবেশ)

নীহারিকা। এই হারু—ও কী গান—?

হারু। আঞ্জে দিদিমণি—‘এই গজল—নজরুলী গজল’—

নীহারিকা। সে জানি—কিন্তু ও গান শিখলে কোথায়—শুনি?

হারু। আঞ্জে—কেন? ভাল? তাওতো আমার গলা নেই—
কিন্তু কোলকাতায় এই চারটের সময় যখন মেয়েদের
ইস্কুলের বাস্ যেতো—তখন এই সাইকেলের দোকান
থেকে ছেলেরা যা গাইত—সে কী চাউনি—যেন মিছরির
ছুরি!

নীহারিকা। চুপ্—বেয়াদপ্! কোথেকে তোমাকে বাবু যোগাড়
করেছিলেন শুনি—?

হারু। আঞ্জে রাস্তা থেকে—

নীহারিকা। কিন্তু এটা রাস্তা নয় জেনো—ভদ্রলোকের বাসা—
এরকম করলে, তোমার চাকরী থাকবে না—

হারু। (স্বগত) কিন্তু যাবার আগে একহাত চেলে যাবো—এ
শর্মা সব ব্যবসা করেছে—(প্রকাশে) না—দিদিমণি—ও
গান আর গাইবো না। আমি জানতাম না আপনি
পেছনে—তা’—‘ভজ মন মেরী মাতার নন্দনে—ভজ
মন—’

নীহারিকা। নাঃ—জ্বালালে দেখছি—কী বেয়াদপ্—। ওহে
বাবু মেরী মাতা—তোমার কী একটুও শিক্ষা নেই—?

হাক্। এ তো—আজ্ঞে আপনারই গান—

নীহারিকা। হোক্, মনিবের সামনে কোন গানই করতে নেই—
বুঝলে ?—এখন যাও—গনে থাকে যেন কথাটা—এখন
যাও এ ঘর থেকে, আমার একটু কাজ আছে।

(হাক্‌র প্রস্থান)

আর এই লোকটা খাটতে খাটতেই যাবে, হুঁদণ্ড
বসবার যো নেই—ইস্কুল, ইস্কুল ! খেয়েই দৌড়িয়েছে
বুড়োর তাসায়—যেন হুঁদিনেই বুড়ো হয়ে গেছে—আমার
সঙ্গে দুটো প্রাণ খুলে কথা ক'বারও ফুরসৎ নেই—কাজের
ভারে কেমন যেন নীরস—বললাম ছুটি নিতে, তা বলে
একা যাবো। আরে বাপু একা যে যাবে—এদিকে তো
নিজের কাছার ঠিক নেই—। এই যে চপলা—

[চপলা ঘরে ঢুকলো—অসামান্য বেশ, হাতে একটা সোয়েটার ফেলা—
মাথার এলো খোঁপায় একটা মস্ত বড় বিলতি ফুল গোঁজা]

চপলা। আচ্ছা মাসী—আমায় একটা গান শিখিয়ে দেবে ?
ভুমি জানো— ? নিশ্চয়ই জানো—কোলকাতার মেয়ে—
অশেষদা বললে—

নীহারিকা। ভূমিকা ছাড়া—কী গান বলো দেখি ?

চপলা। (সুর করে) অলপ বয়সে পীরিতি করিয়া—

নীহারিকা। থাক্—থাক্—বুঝেচি ! ও গান তোমায় কে বল্লে—
অশেষদা বুঝি ?

চপলা । হ্যা, গানও করলেন—কী সুন্দর গলা—

নীহারিকা । তবে না তিনি গান জানেন না—দেখ, তুমি ছেলে-
মানুষ ও গান তোমার জন্তে নয়—বিয়ের আগে ও গান
করে না ।

চপলা । তবে যে রামী করতো—তার তো—

নীহারিকা । তর্ক করো না চপল—গল্পও বলেছেন নাকি তিনি ?
আচ্ছা আমি বলে দেবো'খন ! হ্যা চপল, তোমার মেসো
তোমাদের বাসায় ?

চপল । জানিনে তো—আমি সেই ন'টায় খেয়ে অশেষদা'র
ওখানে গিয়েছি আর এই আসছি । হয়তো হবে— !
আচ্ছা আমি যাই—মা হয়তো আবার ব্যস্ত হবে—

নীহারিকা । তোমার মেসোকে তাড়াতাড়ি আসতে বলো তো
গিয়ে—

চপলা । আচ্ছা— (প্রস্থান পিছনের দরজা দিয়ে)

নীহারিকা । মেয়েটা বড়ো পুরুষ-ব্যাসা— । সেবার দিনকতক
ওঁর কাছে—আবার এই মাষ্টারকে ধরেছে । বয়সের
দোষ—এ বয়সে মেয়েমানুষ যেন বাড়ন্ত লতা—একটা
আশ্রয় না পেলে লুটিয়ে পড়ে । আর তা ছাড়া ঐ মাষ্টার !
হ্যা, দেখলেই প্রেমে পড়তে ইচ্ছে করে । যেমন রূপ—
তেমনি গুণ !

ফাষ্ট' ক্লাসের দাম চপল কী বোঝে— ? ও আর
একটাতেই ডুবেছে । হ্যা, ছেলে বটে ! আমি যদি আজ

বাঁধা না পড়তাম— ? উঃ—সেই রাস্তায় যদি এর সঙ্গে দেখা হতো—ওঁর পার্টনারশিপে যদি—যাক্, কিন্তু মানসবাবুও লোক ভাল। আমাদের ভদ্রলোক সত্যি প্রাণে ভালবাসে। যা হোক্ চপলাকে অতো মিস্তে দেওয়া ঠিক না—কেন ওঁটুকু বয়সেই— ? আর ও ভদ্রলোকই বা কেমন ? এতো রূপ—এতো গুণ, শেষে একটা গোঁয়ো মেয়েকে—না জানে লেখাপড়া—না কিছু আধুনিক ! আমি এসে ওকে হাত-কাটা ব্লাউজ ধরালুম। বড় অকাল পক মেয়েটা !

(রাজেনের প্রবেশ)

রাজেন। দেখুন, আপনাকে একটা কথা যথার্থ বলতে এসেছি। এই আমার একটু ব্যক্তিগত—না যথার্থ ব্যক্তিগতই বা কী ছাই—ও এমনিও পাবো না—ওমনিও ! বিড়ালের ভাগ্যে যথার্থ সিকে আজকাল—নাঃ ! দেখুন বলবো— ? এ উপকারটুকু যথার্থ আপনিই করতে পারেন—আর—একবার যথার্থ আপনিই করেছিলেন।

নীহারিকা। বলুন না—এতে আর দ্বিধার কী আছে।

রাজেন। নাঃ—বলেই ফেলি। দ্বিধা—না—তার কিছুই নেই। তবে কী জানেন—হয়তো মনে করতে পারেন আমি নিজের স্বার্থের জগুই—কিন্তু ই্যা—এটা ঠিক জানবেন—রাজেন বাড়রী যথার্থ ইচ্ছে করলে অনেক সুন্দরী মেয়ে পেতে পারে—তবে যথার্থ ব্যাপারটা কী জানেন—ছোটবেলা

থেকে—আর এতোদিনে একটা মুর্গীর ওপরও যথার্থ মমতা হয়—তা নইলে কোলকাতার এক মেয়ে—চুঁচুড়োর সেই মেয়ে—কী রূপ—? বাপের যথার্থ মস্ত চামড়ার ব্যবসা—ভাবলাম যথার্থ চামড়া বিক্রী কর্তে কর্তে হয়তো চামার হয়ে গেছে—যথার্থ হয়তো মেয়ের গায়ের গন্ধটাও—যথার্থ শুঁকতে দিলো না—হাঁ-হাঁ করে যেন গিলতে এলো—

নীহারিকা। (হেসে) আপনি শুঁকতে গিয়েছিলেন নাকি ?

রাজেন। আজ্ঞে যথার্থ বোঝেন ত ? এক বিছানায়—এই যদি আপনার গা দিয়ে চামড়ার, কী সুট্‌কী মাছের গন্ধ বেরোয়—রাতে মাষ্টার-মশাই যথার্থ কী আর টিক্তে পারবেন ? আমি তাই বলেছিলাম—কিছু চাইনে—মেয়ে আমি শুঁকে নেবো—কিন্তু—তা যাক—যথার্থ এবার আসল কথা ! এই চপলাকে একটু বারণ করে দেবেন যেন ঐ নতুন মাষ্টারটার সঙ্গে বেশী না মেশে—আমার কী যথার্থ—এই কর্তা-মাই বলেছিলেন—যে আপনাকে বলে দিতে—যথার্থ আপনাকে এই একটু যথার্থ ভয় করে কিনা—অবিশ্রি উনি লোক খুব ভালো—গুঁর বিষয়ে আমার কিছুই যথার্থ বলবার নেই—সোনার ছেলে—তবে কী জানেন যথার্থ চপলার এই বয়েসটা—বড়ো ভয়ের ! যথার্থ যুবতী হয়েছে—এখন যথার্থ শরীরের সব জায়গায় একটা লিস্পিস্—যাক—যাবে না কেন—? কিন্তু যথার্থ সময় নেই—আর অতাক্রণ—সেদিন ঐ নীচের ঘরটার

যথার্থ দাঁড়িয়ে পাহারা দিতে দিতে—পাটা টন্ টন্ করতে লাগলো। যথার্থ এক প্যাকেট বিড়ি ফুরিয়ে গেল—তবু কাকশু—? রাত করে—! আপনিই বলুন। আমার কী? যথার্থ কর্তা-মা বললেন তাই আপনাকে—

নীহারিকা। আচ্ছা—আমি মানা করে দেবো—ছেলেমানুষ বোঝে না।

রাজেন। ছেলেমানুষ! যথার্থ সাড়ী ধরলেই মেয়ে যুবতী হ'লো! ও কী সাড়ী ধরেছে আজ!—যথার্থ আমিও মোক্তারি পাশ করলাম আর চপলাও যুবতী হ'লো—না দেখুন আমি যাই—বলবেন ওকে একটু বুঝিয়ে—আর না হয় ঐ মাষ্টারকেও একটু এই যথার্থ ইঙ্গিত দিয়ে দেবেন—পাড়াগাঁ—বুঝলেন তো? লোকে একবার গৌ ধরলে—আচ্ছা আমি যাই! আবার একটু হৈস্কুলে যেতে হবে—

(প্রস্থান)

নীহারিকা। করুক না ওরা যা ইচ্ছে—তাতে আমার কী! রাজেনবাবুর অবশ্য একটু মাথা-ব্যথা আছে। আরে ও-মেয়ে কী আর রাজেন মোক্তারকে চায়?—ও এখন রূপের স্বাদ পেয়েছে। বয়েসেরই গুণ। কিন্তু সে ভদ্রলোকই বা কেমন—? প্রেম করবার আর লোক পেলেন না! কোলকাতার ছেলে শেষে একটা গেঁয়ো—হারু—ও হারু—

(হারুর প্রবেশ)

হারু। আজ্ঞে—

নীহারিকা। ত্বাথ—গিয়ে ঐ নতুন মাষ্টার-মশাইকে ডেকে আন

দেখি, বলো—দিদিমণি চা খেতে ডাকচেন—আর ঠাকুরকে
হ'কাপ চা দিতে বলো— (হারুর প্রস্থান)

বাই ততোক্ষণ কাপড়টা ছেড়ে আসি। চুলটাও একবার
জড়িয়ে নিতে হবে। ঝুলন্—ও ঝুলন্—

(ঝুলনের প্রবেশ)

ত্বাথ, বাথরুমে জল রেখেছ ? নাকি রোজ বলতে হবে।

ঝুলন্। নেহি হজুর—বহুক্ষণ রাখিয়ে হেসেছি—সাবুন্—তয়লা—
সবকুছ—।

নীহারিকা। বেশ করেছ—মালীকে বলে' একটা ভাল তোড়া
আর কিছু খুচুরো ফুল এনে এই টেবিলে রাখ—বুঝলে ?

ঝুলন্। হজুর— (নীহারিকার প্রস্থান)

আরে—এই যে বামী ! এসো এসো—বলি, কি খবর
আছে ? আমাকে কী একেবারে ভুলিয়ে গেলে—কেমন
কাপড় দিয়েছি—পছন্দ হয়েছে তো—আরে তোকে যা
মানাবে—

বামী। মর্ মিন্সে—উনি এলেন এখন প্রেম কর্তে—কে কোথায়
গুনবে যে রে— ? বলি তোর মাইজী কই ? আমাকে
খবর দিলে কেন ?

ঝুলন্। মাইজী—? এখন নেই, আয় ছুটো কথা কয়ে লি।

হাজ যাবো সন্ধ্যার সময়—কী বলিস্—

বামী। খোটা বেটার সখ্ দেখো—নারে মুখপোড়া না, আজ একটু কাজ আছে—তোর মাইজী কইরে?

ঝুলন্। মাইজী বাথরুমে গিয়েছে। এই ছুটো টাকা লে—বলি যাবো ত?

বামী। (টাকা আঁচলে বেঁধে) তা যাস্—! কিন্তু তোর মাইজীর সঙ্গে আর কে গিয়েছে? ফিরবে কখন?

ঝুলন্। (হেসে) বলতে মানা হাছে—দেবী হবে ফিরতে—হামি যাই—আবার মালীকে বলে ফুল আনতে হবে।

(যাবার সময় বামীর গাল টিপে প্রস্থান)

বামী। আ মর্! ওমা, এই তো দিদিমণি? বেটা কী মিথ্যে বলে!

(নীহারিকার প্রবেশ)

কী জন্তে ডেকেছিলে দিদিমণি?

নীহারিকা। ওঃ! হ্যাঁ দেখো, মাথাটায় বড় আঠা হয়েছে, কাল এসে একটু ঘষে দিয়ে যেও তো—একা একা পারিনে—ঐ উনি আসছেন, আচ্ছা এখন তুমি যাও। (বামীর প্রস্থান)
এই যে আহ্নান মিঃ চক্রবর্তী—নমস্কার!

(অশেষের প্রবেশ)

অশেষ। নমস্কার। হঠাৎ অসময়ে ‘আবার আহ্নান’? মিষ্টার কই?

দ্বিতীয় অঙ্ক

নীহারিকা। মিষ্টার না থাকলে আসতে কী আপনার মর্যালিটিতে
বাধে নাকি ?

অশেষ। মর্যালিটি ? আধুনিক ছেলেদের মর্যালিটি ? সোনার
পাথর বাটি—ও শব্দটির এখনো আমি origin পেলাম না।

নীহারিকা। origin সনাতনী বাবাদের জিহ্বা। যাক্, বস্তুন।
ওরে হারু, চা দে। দেখুন, আপনি আমাকে সোজা নাম
ধরেই ডাকবেন—আর ‘তুমি’। আপনার স্ত্রীর নামও
যখন—তখন তো—

অশেষ। যো হুকুম। কিন্তু logical conclusion করলে খুব
লজ্জা পেতেন—যাক্। কিন্তু আমাকেও ‘তুমি’ বলতে
হবে—নয় তো—

(হারু চা ইত্যাদি রেখে গেল)

নীহারিকা। সেটা পারবো না বোধ হয়—বিশেষ গুর সামনে,
আচ্ছা চেষ্টা করবো। আচ্ছা আপনি সুকল্যাণীকে চেনেন ?

অশেষ। কোন্ সুকল্যাণী ? যিনি সংস্কৃতে ফার্স্ট হলেন ?

নীহারিকা। হ্যাঁ—হ্যাঁ, আমার বিশেষ বন্ধু। ওর যা একটা
চ্যাপ্টার আছে—চমৎকার ! চলুন বাগানে চা খেতে খেতে
বলবো—থ্রিলিং—

অশেষ। এই শীতে বাগানে ?

নীহারিকা। শীত বলেই তো ? জড়তার মূল্য আছে। জম্বে
ভাল, চলুন। হারু চা-টা আমাদের বাগানে দিয়ে যা।

(হ’জনের প্রস্থান—পশ্চাতে হারু চা নিয়ে গেল)

(ছুটি বিভিন্ন দরজা দিয়ে একই সময়ে মানস

ও হারুর ঘরে পুনঃ প্রবেশ)

মানস । এই যে হারু, তোর দিদিমণি কোথায় রে ?

হারু । আজ্ঞে বাগানে—

মানস । এই শীতে—না, আবার ভোগাবে দেখছি । আচ্ছা
জালালো দেখছি ।

হারু । বলচেন জম্বে ভাল ! নতুন মাষ্টার আর তিনি চা
খাচ্ছেন ।

মানস । ও, আচ্ছা তুই যা, আমাকে এই পাশের ঘরে চা দিয়ে যা
—হ্যাঁ, আর ঝাখ্—তোর দিদিমণিকে জানাস্ না যে আমি
এসেছি—খবরদার !

হারু । আচ্ছা বাবু—

(প্রস্থান)

মানস । হুঁ, আবার দাবার চাল । বাবা পুরোণ ঘি়ের দাম
আছে—পুরোণ ঘা সারাতে অব্যর্থ । এইবার কম্‌লি
ছাড়বো—ছুটি নিয়ে—একেবারে ছুটি । কোলকাতায়
গিয়ে চটপট একটা হিন্দুর মেয়েকে বিয়ে করে—বাস্ !
আর গ্র্যাজুয়েট নয় । উঃ, আইডিয়া যে এমন মারাত্মকে
দাঁড়াবে কে জানে ! একেই বলে খাল কেটে—না দেখি,
ব্যাপারটি কোথায় দাঁড়িয়েছে । ঐ ঘরে চুপ করে বসে
থাকি, এ ঘরে আসলে কিছু সংগ্রহ করা যাবে । যাবার

আগে একবার—নাঃ দরকার কী ? ফাঁস করলে আমারও বদনাম—আর তাছাড়া কাপুরুষতা ! ও-ই তো real স্বামী, আমি তো commercial ।

(হারুর প্রবেশ চা নিয়ে)

ঐ ঘরে দে—আর আলো জালিসনে, অন্ধকারেই খাবো—মাথাটা ধরেছে আলো সহিবে না—চল ।

(উভয়ের প্রস্থান)

(হারুর পুনঃ প্রবেশ চা দিয়ে)

হারু । এ আবার আর এক পালা । ঝাখা যাক্, আমি মোদ্দা ঝোলের লাউ, অম্বলের কছ—কিন্তু মাষ্টারনীকে একবার দেখাতে হবে—আমাকে বড় জালায় ! নিত্য নতুন ! গভীর জলের মাছ—ঝাখা যাক্ ! ভজ মন নন্দ ঘোষের নন্দনে—

(তান ভাঁজতে ভাঁজতে প্রস্থান)

(অশেষ ও নীহারিকার প্রবেশ)

নীহারিকা । কেমন লাগলো ?

অশেষ । চমৎকার ! শীতের জড়তা ভাঙ্গল তোমার কুপায় । ওর lifeটা কী গ্লিিং, এতোদিন পরে নিজের হারান জিনিসকে বুকে তুলে নিলো—মাঝেরটা ভুলে যাও, তা হ'লে জম্বে ভাল—

নীহারিকা । হ্যাঁ, প্রেম তার প্রথম বস্তুকে হারায় না—পরের গুলো ঝুটো, ওটা একটা সাময়িক অভাবের পূর্ণতা—চরিতার্থতা ।

(পাশের ঘরে কী যেন ঝন্-ঝন্ করে ভেঙ্গে উঠলো)
ও কী ! বেড়ালে বোধ হয় কিছু ভাঙ্গলো, দেখি—তুমি
একটু বসো—(পর্দা সরিয়ে পাশের ঘরে প্রবেশ)

(নেপথ্যে)—কে ?

(আলোর স্নাইচ টিপে) ওমা—তুমি ? এই অন্ধকার ঘরে !
পেয়শা ভেঙ্গেছে ? তা ভাঙ্গুক, হারু কুড়িয়ে নেবে'খন ।
তুমি এসো, মিঃ চক্রবর্তী ওঘরে—

(তার হাত ধরে নীহারিকার প্রবেশ)

এই যে বিড়ালটি চুরি করে' ছুধ খেতে গিয়ে ধরা পড়েছেন
—বস ।

অশেষ । হ্যালো, নমস্কার । অন্ধকারে ছিলেন যে—

মানস । হ্যাঁ, বড় মাথাটা ধরেছে—

নীহারিকা । ধরবে না—দিন নেই, রাত নেই—ইস্কুল, ইস্কুল :
মিঃ চক্রবর্তী বসুন—আর এক কাপ চা খান—ওরে হারু,
তিন কাপ চা—

(সকলে বসলো)

মানস । (স্বগত) হুঁ, আমার সামনে 'আপনি' আর পেছনে
'তুমি', পুরোণ ধরে বুকে তুলে নেওয়া—প্রেমের প্রথম
অধ্যায়কে আরাধনা । আমারটা তো সাময়িক অভাবের
পূর্ণতা । বাবা, খুব কাজ চালিয়ে নিয়েছ ? (প্রকাশে) হ্যাঁ,
খাটনিটা খুব বেশী পড়েছে—কিছুদিন ছুটি নেবো ভাবছি ।

নীহারিকা। আমি রোজ বলছি, একটু চেঞ্জ দরকার—আমি সঙ্গে যাবো বলে তো নিচ্ছ না? আচ্ছা আমি যাবো না, না হয় তুমিই দিনকতক ঘুরে এসো—‘পতির পুণ্য সতীর পুণ্য’—খরচ বাঁচুক—

(হারু চা দিয়ে গেলো)

মানস। (স্বগত) তা তো থাকবেই—জন্মে ভাল। একেবারে গড়ের মাঠ। বাবুলাহাটির টিকিট আর কাটছিনে— একেবারে ডুব! (প্রকাশে) না না, তা না, তবে এই বুড়ো-বুড়ী ছাড়ে না—সেবার দেখলে তোহু হু’-ছুটো ইঙ্কলের ম্যানেজমেন্ট—দেখি এটা খুলুক—

অশেষ। (একটা সিগারেট নিজে ধরালো—আর একটা মানসকে ধরিয়ে দিলো) আচ্ছা, আজ গুড্-নাইট করি—কাল আবার দেখা হবে।

নীহারিকা। চলুন আপনাকে সি ডিটা পর্য্যন্ত পৌছে দিয়ে আসি, তুমি আর মাথা ধরা নিয়ে এসো না—অসুখ-বিসুখ না করে—বরং ওঘরে গিয়ে বসো, আমি আসছি।

(নীহারিকা ও অশেষের প্রস্থান)

মানস। হুঁ! বিদায়টা হওয়া চাই তো—রাতের বিদায়! আর ক’টা দিন কাটিয়ে দি চোখ-কান বুজে। আরে আমার তে! গচ্ছিত ধন, যেন মর্ডগেজ নিয়েছিলাম—বাই ওঘরে।

(প্রস্থান)

তৃতীয় অঙ্ক

প্রথম দৃশ্য

[হুঁমাস পরের কথা । পূর্ণ উৎসাহে ও উত্তমে দুই স্কুলই চলেছে ।

অশেষের ড্রইং-রুম, অঙ্ককার ছিল ঘরটি—শোবার ঘরের

আলোর থানিকটা ভারী পর্দার ঝাঁক দিয়ে এসে

ঘরটাকে একটু যেন পরিচ্ছন্ন করছিল ।

তবে মানুষের মুখ চেনা যায় না]

(রাজেনের প্রবেশ)

রাজেন । নাঃ সন্ধ্যাবেলা যথার্থ কোথায় একটু বেড়াবো, তা না
ওৎ পেতে বসে থাকো । জীবনটা যথার্থ জর্জরিত—আমি
যেন বদ্ধ গলির গাঁটকাটা ! ঠিক আসতে দেখেছি—ঠিক
তুকেছে ঐ ঘরটায়—ঐ যে কথা ! কর্তাবাবু বলে চপলা
ছেলেমানুষ, হুঁ—মেয়েমানুষ তো ! ওরা যথার্থ এ বিষয়ে
ন’ বছরেই সাবালক হয় । একা মাষ্টার—যুবক, এই
নিরালা সন্ধ্যাবেলা, সব জ্ঞান টন্টনে—আর আমি শালা,
এই অঙ্ককারে পাহারা দিচ্ছি, যেন যথার্থ চোর । নাঃ আর
ছেড়ে দেবো, ও আর পাওয়া যাবে—হুস্তোর, মেয়ে যথার্থ

অনেক জুটবে—ঐ, ঐঃ পদ্মার ফাঁক দিয়ে দেখা যাচ্ছে—
দেখেছ, যথার্থ কতো গা-ঘেঁষে বসেছে, যেন আঠালু যথার্থ,
আর ঐ মাষ্টার ব্যাটা ওর হু'খানা হাত নিয়ে ওকী করছে
যথার্থ—হু'খানা যেন... ..ও বাবাঃ—ঐ যে
আবার ! ও—বা—বাঃ ! যথার্থ আর বেকার চেষ্টা ! এ
একেবারে শেষ অঙ্ক, ছুঁড়ির পেটে এতো বিত্তেও যথার্থ
ছিল, তাই রোজ আসা হয়—যেন পায়খানা, না গেলেই
যথার্থ চলে না। যাই, কালই সব দেবো ছেড়ে—কিন্তু
যাবার আগে দেখিয়ে দেবো রাজেন্দ্রনাথ বাড়রী—

(হারুর প্রবেশ)

হারু । কে ঘরে, অন্ধকারে বসে—

রাজেন । কে হারু—এই আমি যথার্থ— ! তা তুমি একটু
মাষ্টার-মশাইকে যথার্থ খবর দেবে—আমি একটু দেখা
করতে চাই—কে যেন আছেন, যথার্থ এটিকেটে
বাধে—

হারু । ও তো বড়-বাড়ীর দিদিমণি—টিকিটে আবার কী বাধে ?
কোথাকার টিকিট সিক্রিটারীবাবু— ? পটলডাঙ্গার দিতে
পারেন—পটলিকে একবার—

রাজেন । হুঁ—যথার্থ পটলডাঙ্গারই—তা দেবো—তুমি একটু
খবর দাও দেখি—হু'জনে একটু ভাগাভাগি—, যথার্থ
আল্দা হোক তো—

(চপলার প্রবেশ—ওঘর থেকে)

চপলা। কে হারু ? কার সঙ্গে টিকিট কাটছো— ? ও মা—
রাজুদা যে ! কী দরকার রাজুদা— ? মাষ্টার-মশাইকে— ?
আহা, শোনেননি !—তঁার স্ত্রী মারা গেছেন—এক্সুনি
টেলিগ্রাম এলো—এখন খুব মুন্ডে আছেন—আপনি বরং
কাল আসবেন—এখন যান—

রাজেন। তা বরং যাচ্ছি। তোমার যথার্থ ইয়েতে আর বাধা
দিতে চাইনে—আহা—স্ত্রী মারা গেলেন—বড় মুন্ডিল
হ'লো যথার্থ—এতোদিন তবুও একটা যথার্থ কাছাটান্
ছিল—এবার—এবারই সব যাবে—আচ্ছা আমি যাচ্ছি—
মুন্ডে আছেন—তা তুমিই তো আছ— ! কালই ছুটি নিন্
—অন্ততঃপক্ষে মাস খানেকের, কী আরো বেশী—যথার্থ
মন খারাপ হ'লে চাকরী ছেড়েও দিতে পারেন—

(দামোদর, মানময়ী, মানস ও নীহারিকার প্রবেশ)

দামোদর। কে চাকরী ছাড়বে রাজু—মাষ্টার ? কেন ? কই
মাষ্টার— ? চপলা ডাক্তো এখানে—

(অশেষের প্রবেশ—মর্ম্মাহত যেন)

কী গো সন্নেসী হবে নাকি ?—চাকরী ছাড়বে কেন ?
পুরুষের বৌ মারা যাবে না তো, কী মেয়েদের যাবে— ?
ছিঃ ছঃখ করতে নেই !

(সকলে বসিলেন)

রাজেন। আজ্ঞে না—উনি কেন ছাড়বেন—? ঐ ছটু ছাপরাশীটা—না দেখুন আমি যাই—যথার্থ কাল আবার একবার সদরে যেতে হবে—মোক্তারীটা এবার স্মর করবো যথার্থ—আর কতোদিন যথার্থ ভুতের বেগার—

(প্রস্থান)

মানময়ী। তুমি ভাই অমন মন-মরা হ'য়ো না—শরীর ভেঙ্গে পড়বে যে—! বউ গেলে শোক করতে নেই—পুরুষের লজ্জা করে না? লোকের হ'বার তিনবার যাচ্ছে—ওটা মদের নেশা—ছুটে গেলে আর মনে থাকে না—সতী-লক্ষ্মী সে—তা পেটেরটা আছে ত ?

নীহারিকা। ডেলিভারী হোতে বুঝি—? আহা—বেচারী—

অশেষ। আজ্ঞে না—দুটোই গেছে! তা ভালোই—আবার ওটাকে কে দেখতো দিদিমা—তিনকূলে কেউ নেই যার—! দেখুন আমাকে দিন পনেরর ছুটি দিন কাল থেকে—একবার স্বপুত্র-শাশুড়ীর সঙ্গে দেখা করে আসি—তাদের আছরে মেয়ে—সবে সেদিন—

দামোদর। বেশ ত—যাবে বৈকি! তবে চট করে ফিরে এসো। হুঃখ কী—নতুন বয়েস—আমাদের কালে গঙ্গার ঘাট পর্য্যন্ত বিয়ের বয়েস থাকতো—

মানস। (স্বগত) আমাকে যেন ভোজবাজী দেখাচ্ছে—উঃ কী দারুণ ছেলে—কেমন কায়দাসে পালাচ্ছে! সব যেন আঘাতে স্বপ্ন—জোড়ে যাচ্ছেন না তো—? আমার মুখে

থুথু না দেয়—!! কোলকাতায় গিয়ে একবার এঁর পায়ের ধুলো নিতে হবে—

(প্রকাশে—নীহারিকাকে)

কোলকাতা যাবে তো যাও না—সকলের সঙ্গে একবার দেখা-শুনা করে’, আবার এঁর সঙ্গেই না হয় ফিরো—
আমার যাওয়া হয় কি না হয়—

নীহারিকা। না—তার দরকার নেই, তুমি না গেলে যাবো না !
একেবারে গরমের ছুটিতেই যাবো—

মানময়ী। শুনলে গো—আর তুমি তো খাজনা আদায় করতে যেতে পাঁচ দিনের নাম করে’, কাটিয়ে আসতে এক মাস !
আগেকার বউ ছিল একটা মেয়েমানুষ—সে যত্রতত্র মিললেই হ’লো—

দামোদর। জাখো গিন্নী—মিছে বলো না—তোমায় ছেড়ে গিয়ে সেখানে সারারাত বিছানা হাতড়িয়েছি—একবার তো, পাশে ছিলেন নায়েবমশাই—তার মুখে ঘুমন্ত চোখে—

মানময়ী। .থাক্ থাক্—ও গল্প অনেকবার শুনেছি—মেয়ে রয়েছে সামনে ! বুড়ো হচ্ছে আর তোমার মুখ বাড়ছে—হ্যাঁ—জাখ, তোমার নতুন নাতীকে আজ আর এ বাসায় একা রেখো না—গ্রহশাস্তি না হ’লে একা থাকতে নেই, আজ রাতে আমাদের বাড়ীতে থেকে কাল সকালে কোলকাতা চলে যাবে’খন !

দামোদর। ঠিক বলেছ গিন্নী—তাই করতে হবে ! তবে চলো

এখন ওঠা যাক—বাড়ীতে গিয়ে বসা যাবে—নাতীকে
টাকা-পয়সা দিয়ে রাখি, কাল আবার সকালে তাড়াহুড়ো
—কিছু বেশীই তুমি নিয়ে যাও নাতী—বিপদের সময়—
বুঝলে না—? কতো দরকারে লাগে—চলো যাই—
নাতীবো তুমিও চলো—বাড়ী পরে যেয়ো।

মানময়ী। ঝাং—হারুকে বলে যাই—এঘরে শুতে ! বাড়ী খালি
রাখতে নেই—দোষ আমাদের হিন্দু-শাস্ত্রে। ওরে ও
হারু—হারু—ঝাং তো মা চপল—ব্যাটা বোধ হয় কোথাও
দাঁড়িয়ে দাঁড়িয়ে ঘুমচ্ছে—

(চপলার প্রস্থান)

তুমি মন-মরা হ'য়ো না ভাই—সে ছিল সতী-লক্ষ্মী—
সিঁথির সিঁদুর বজায় রেখে—(উদ্দেশে নমস্কার করে')
আমি অমন যেতে পারি— !

দামোদর। যাও না, আমি অমনি চট্ট করে' একটা ডাগর দেখে—
মানময়ী। তা আর জানিনে—তোমাদের তো ওটা মূর্গী পোষা—
ডিঙও খাবে—মাংসও খাবে—বিয়ে তো পুরুষের মুজা-
দোষ—

দামোদর। অগ্নি চৌকি ফুললো—দেখছ নাতীবো এখনো অভি-
মানের জালা ! ঐ যে হারু—এই হারু—তুই আজ এই
ঘরে শো—বুঝলি—? বাড়ী আর যেতে হবে না ! মাষ্টার-
মশাই আসবে না—ব্যাটা বাড়ী খালি রেখেছ কী—চল
সব—চপল তোর অশেষদাকে কথাবার্তা বলে একটু

ভুলিয়ে-ভালিয়ে রাখ্—আহা, ও কী ভোলা যায়—বিয়ে
করে লোকে পরীক্ষার পড়া ভোলে—

(সকলের প্রস্থান)

(হারু তাদের দরজা পর্যন্ত এগিয়ে দিয়ে এসে

একখানা সোফায় বসে পড়লো)

হারু। একেই বলে একদিনের রাজা—আজ রাত-ভর আমি
রাজা—ঠিক এই সময় যদি বামী আসতো—তাকে করতাম
রাগী ! তা ভাগ্যে নেই যার—হ্যাঃ ! এইবার একবার ভেঁ
করে গিয়ে পট্টলিকে নিয়ে আসবো—দেখুক এসে— !
বষ্টমী যে হবে,—ভয় দেখায়—তার সোয়ামী আর
কোলকাতার ভিকিরী নয়। এবার তাকে নিয়ে আসবো—
সবাই সস্ত্রীক থাকে, আমি কী দোষ করেছি—এখন যাই
চট্ করে বামীকে ডেকে আনি—একটু মৌতাত হওয়া
যাবে। ঐ যে কার ছায়া—কে ? বামী নাকি লো— ?
আরে এসো এসো—(সুর করে) ‘তোমারি লাগিয়া পথ
পানে চেয়ে—’

(রাজেনের প্রবেশ)

রাজেন। কে ? যথার্থ হারু ?—খাম্কা গান্— ? বাবুরা
কোথায় ?

হারু। কে ? সিকরটিরি বাবু ! আমি বলি—ছোঃ ! তা কী
খবর ! এই রাতে ?

রাজেন। এই মাষ্টারের খোঁজে। তা যথার্থ আছেন? আর কে কে আছেন? বলতে পারো—এই একটা বিড়ি খাও দেখি—

হারু। কেউ নেই—সব বড়-বাড়ী! মাষ্টার-মশাই আজ রাতে ওখানেই থাকবেন—বউ মরেছে কিনা—

রাজেন। ওখানেই? এই সেরেছে? যথার্থ চপলা আছে ও-বাড়ীতে—রাতে একা একা—বুড়ো সব ডোবালে। বোঝে না তো, ভাবে ওদের কালই বুঝি আছে—আরে এ যুগ যে যথার্থ সাব্‌মেরিনের যুগ—সব ডুবে ডুবে—তা মেয়েটাকে লেলিয়ে দিলে না ত? সোনার-চাঁদকে যথার্থ টেনে রাখতে? বউ সব মরেছে—এ সময় কী যথার্থ মেয়েমানুষ কাছে থাকা সেফ?—সেই জন্তেই দশ দিন কামানো মানা—যথার্থ মেয়েমানুষ বাতে ভয়ে কাছে না আসে—তা হারু, একটা কাজ করতে পারবে—? তোমাকে মোটা টাকা দেবো—

হারু। না বাবু—সেবার একবার আপনার জন্মি—উঃ, এখনো পিঠে দাগ আছে—খট্‌মটের সে কী পট্-পট্‌ বেত্—! আপনি ভদ্র লোক, এসব কী নজর বাবু—?

রাজেন। যথার্থ নজরটা শুধু আমারই, তোমার নজরে পড়েছে—যথার্থ প্রথম থেকে আজ রাত পর্যন্ত এই টাঙ্গ-অফ্-ওয়ার, ভাব দেখি—হঁ—! আমার নজরের জন্তেই সব—যথার্থ সব সজোড়ে আছে, নয়তো কবে বে-জোড় হয়ে যেতো।

তা জ্ঞাথ, তোমাকে পাঁচ টাকা দেবো—যথার্থ একটু উপকার—(হারুর হাত ধরলো)

হারু। আহা, হাত ছাড়ুন বাবু—অন্ধকারে কেউ দেখলে কী ভাববে—কেউ দেখে একজনকে ঠিক মেয়ে ঠাউরে নেবে—আপনার একটা বদনাম—আর এবার বড়বাবু ধরলে আর ছাড়বে না—চাকরীটা গেলে আবার কোলকাতায় গিয়ে অন্ধ হ’তে হবে—এবার পটলিকে আনবো ভাবছি—শুভকস্মে আর বাধা দেবেন না বাবু—।


রাজেন। যথার্থ চারিদিকে তোমাদের শুভকস্ম ! আর আমারই যেন যথার্থ দুঃগ্রহ লেগেই আছে—নাঃ যাই দেখি একবার বড়-বাড়ী—যদি কিছু ব্যবস্থা করা যায়। এই রাতে, বউ-মরা ছেলে দিয়ে—সোমন্ত মেয়ে দিয়ে—কর্তার বাহাতুরে পেয়েছে—
(প্রস্থানোত্তম)

হারু। বাবু—শুনবেন একটু।

রাজেন। কী যথার্থ রাজি ? তা জানি—তুমি কী কম ভালবাস ? খুব ওবিডিয়েন্ট—যথার্থ—

হারু। না—বাবু তা নয়—এই যাবার পথে বামীকে একটু পাঠিয়ে দেবেন—বিশেষ কাজ, মাষ্টার-মশায়ের হুকুম—তা আমি বাড়ী ছেড়ে যাই কী করে’—যদি দয়া করে’—

রাজেন। যথার্থ আমার সময় নেই—খাইনি এখনো—বড়-বাড়ীতে কতক্ষণ যথার্থ থাকতে হয় কে জানে— ? তুমি থুঁজে আনো। উঃ—বাইরে কী অন্ধকার—যথার্থ চপলার:



তৃতীয় অঙ্ক

জন্তে একদিন দেখছি সাপেই খাবে ! এতো কষ্ট, তা—
 উঃ—যেন ছোন্ যথার্থ— ! নাঃ—রামকৃষ্ণ ঠিকই বলে-
 ছিলেন,—“কামিনী কাঞ্চন”—নাঃ, যথার্থ ওদিকে এতক্ষণে
 হয়তো— (প্রস্থান)

হারু । হুঁদিকেই সমান ফুটেছে— ! দেখি কী হয় । ছত্তোর
 লেখাপড়া—মেয়েজাত লেখাপড়া শিখলেই—ধিক্কা ! এই
 তো পটলি—ই্যা ভয় দেখায় বটে যে বোষ্টমী হবে—কিন্তু
 আমায় ছাড়া—এই তো সেবার সেই ছুখীটাকে—খ্যাংরা
 দিয়ে— । যাই একবার বামীকে দেখে আনি—

(প্রস্থান)

দ্বিতীয় দৃশ্য

[এক মাস পরের কথা ; মানস মাষ্টারের ড্রিং-রুম । হারু নিশ্চিন্ত মনে
 মানসের সিগ্রেটের কোঁটো থেকে একটা সিগ্রেট বের করে
 সবে ধরিয়েছে—এমন সময়—]

(মানস বেগে প্রবেশ করলো)

মানস । এই হারু—তোর—ওরে বেটা তুমি চুরি করে সিগ্রেট
 খাচ্ছ—(হারু তাড়াতাড়ি কোন উপায় না পেয়ে স্বল্প-দম্ব
 সিগ্রেটটি পুনরায় কোঁটোর মধ্যে রেখে দিল) ওরে বেটা
 গর্দভ—ও কি করলি—সব পুড়ে ছাই হয়ে যাবে যে—নে

বেটা ওটা নিয়ে যা—বের কর শিগ্গীর—(হারু তাই করলো) যা শিগ্গীর তোর দিদিমণিকে পাঠিয়ে দে—
জল্দি—আমি বসলুম এখানে—আর হু'কাপ চা। “হারি
আপ্ ম্যান্”—বেটার সখ্—তাই হু'দিনেই টিন খালি হয়।

(হারুর প্রস্থান)

উঃ খোদা খুব বাঁচিয়েছে—রামায়ণ লিখতে গিয়ে
ভূমিকাই ভুল—সীতার বনবাস দিয়েছিলাম আর কী—
কই রে তোর দিদিমণিকে পাঠা—শিগ্গীর—হালো—‘মাই
নেবুলি—my star-dust—dear, darling—’

(নীহারিকার প্রবেশ)

নীহারিকা। কী ক্ষেপে গেলে নাকি—অত ইংরেজি-আদর
হঠাৎ—? বিলিতি মদ খেয়েছ নাকি! চারিদিকে চাকর
ঠাকুর—ওরা ভাববে কী বলো তো—

মানস। যা ইচ্ছে ভাবুক—পর-স্ত্রী তো নয়—ভাববে বাবু
বউ-পাগলা—

নীহারিকা। ভাববেই তো—বউকে আদর করবার জন্ত সময় ও
স্থান আলাদা থাকে। রাস্তা-ঘাটে—

মানস। বটে! নিজের বউকে আদর করবো লুকিয়ে—কেন
এ কী পরকীয়া প্রেম করছি—আধুনিক যুগ! যাক্ বাজে
কথা, তুমি কী করছিলে? হাতে ও কী লেগে?

নীহারিকা। পরশু কোলকাতা যাবে—তাই হু'খানা মাছের চপ্

করছিলাম নিজের হাতে ! তাই কী হ'লো—হঠাৎ যেন ডাকাত পড়লো !

মানস । চুলোয় যাক্ চপের মাছ—যাবো না কোলকাতায় ।

নীহারিকা । কেন কী হ'লো ? এই না ক'দিন ধরে মুখে বর্ষা নামিয়েছিলে ! আমি যেন একটা পাপ—তাই-না গেলুম না ! যাও বাপু তুমি একলাই যাও—সঙ্গে থাকলে ফুঁতির বাধা পড়তে পারে ! কিন্তু দেখো, আবার যেন পার্টনারশিপে অগ্র কোন চাকরী—

মানস । সেই জন্তেই তো যাবো না—কোলকাতায় বড় ছেলে-ধরা এসেছে, ঝাঁকে ঝাঁকে মেয়ে—হয়ং ম্যান্ দেখছে কী ব্যস্—

নীহারিকা । ছাথ, ঠাট্টা ভাল লাগে না । যাই—ঠাকুর আবার ছাই করে রাখবে—(প্রস্থানোত্তম) আঃ কী যে করো—অমন খপ্ করে কাপড় চেপে ধরো কেন ? একটা আবরণ নেই । কাল রাতে বললুম—এসো একটু গল্প করি । চলেই তো যাবে—পনের দিন কী করে কাটবে তাই ভাবছি—তা তখন যেন কুস্তকর্ক হ'লে ! সেই যে পাশ ফিরলে—আর দিন-দুপুরে প্রেম, ভাগিস্ বাড়ন্ত ছেলে নেই—তা'লে সে যা ডেঁপো হ'তো—

মানস । সত্যি যাবো না কোলকাতায়—তুমি হাত ধুয়ে এসো দিকি, সব বলছি—আর চপ্ ঠাকুরকেই ভাজতে বলো—

আসছ তো ? নয়তো গিয়ে ঠাকুরের সামনেই—বুঝেছ ?

নীহারিকা । তা তুমি পারো ! আচ্ছা আসছি । (প্রস্থান)

মানস। উঃ, আর একটু হ'লে সব টুপ্ করে তলিয়ে যেতো—
 আবার হয় তো সেই বেকার—সেই কোলকাতায় ফুটপাতে
 ফুটপাতে, এখানে হাত পাতে, সেখানে হাত পাতে, নো
 ভেকেসি! এই যে সুখ, সাজানো সংসার, টুপ্ করে যেতো
 —ভাগ্যিস্! একেই বলে নিজের পায়ে কুড়ুল মারা।
 ভাগ্যিস্ ফটোটা আজ আবার পরীক্ষা করেছি—কাগজটা
 তুলতেই সব জ—ল্ হয়ে গেল। ইঁ্যা, আলবৎ ছেলে এই
 অশেষ চক্রবর্তী, যেমন পড়াশুনা, তেমনি practical
 lifeএ; চালাক বটে! আমার বাবা। আহা গরীব
 বেচারী, আমি ওর দুঃখ বুঝি—একই পথের পথিক, বাক্
 সব চাপা দি—আর এ বেচারীর ওপর বেকার সন্দেহ,
 আরে তা কী হয়—যে পার্টনারশিপে আসতে চায় না, সে
 বেমানুম কেঁদে বুকে লুটিয়ে পড়লো—যতোই গ্র্যাজুয়েট
 হোক বাংলার মেয়েরা—ঐ কী বলে, 'বুক ভরা মধু'—তাই
 তো বাংলা। বুকে ও-জিনিস আর কোন দেশে—

(নীহারিকার প্রবেশ)

বসো—ঠিক আমার এই পাশে বসো দেখি—না না,
 কোন কথা শুনবো না। লক্ষ্মীটি—ওরে হারু চা দে—
 ব্যাটার হুঁস দেখো।

(নীহারিকা পাশে বসলো। মানস এক হাত
 দিয়ে তার গলা জড়িয়ে ধরলো)

নীহারিকা। আঃ, কী করো, এক্ষুনি হারু আসবে—

মানস। হারু কেন, আমার মৃত বাবা আসলেও ছাড়ছিলেন—উঃ,

আর না, আর তোমাকে ছাড়া নয়—

নীহারিকা। কী হলো তোমার ? সিদ্ধি খাওনি তো ? সত্যি

কোলকাতা যাবে না ?

মানস। না গো না—সত্যি যাবো না। একেবারে গরমের ছুটিতে যুগলে।

(হারু চা রেখে গেল, মানস পূর্ববৎ)

কিন্তু এদিকে এক খবর, বুড়ো অশেষের সঙ্গে চপলার বিয়ে ঠিক করেছে, অশেষও রাজি—এই তো তার বাড়ী থেকে আসছি।

নীহারিকা। বলো কী ! এখনো দু'মাস হয়নি তার বউ গেল।

পুরুষমানুষ তো এই দামের, আজ আমি মরি—কালই তুমি আর একটা পার্টনারশিপ যোগাড় করবে।

মানস। আর যদি আমি মরি ? কালই তুমি শুধু চাকরীর খাতিরে—

নীহারিকা। (মুখ চেপে) থাক থাক হয়েছে, মেয়েমানুষ অতো কান্দাল নয়, তারা বিধবা হয়—তোমরা হও ?—ওগো ছাড় ছাড়, ঐ দাদামশাইরা আসছেন—

(দামোদর ও মানময়ীর প্রবেশ)

দামোদর। যাক্, চক্ষু সার্থক হলো। প্রাতে যুগল-মুর্ত্তি—দেখলে তো গিন্নী ? বুঝলে নাতি, আমারো মাঝে মাঝে সাধ হয়

অমনি গলা জড়িয়ে ধরি—তা গিল্লীর তখন—হয় হাতে
ময়দা নয় মুখে মিশি—একেবারে কালীমূর্তি। আর রাতে
শুঁর কোমরে বাত। নাঃ বুড়ো হওয়াই পাপ, বউ তখন
একটা অলঙ্কার মাত্র।

মানময়ী। আর তুমি বুঝি এখনো যুবাই আছ, না? ইস্কুল—বদন
সরকার—এই তো সেদিন ‘ওরে ব্যাটা বদন’ বলে আমার
চুল ধরে ঘুমের ঘোরে এই টান—মাথাটা চন্ করে ধরে
উঠলো। মেয়ে পাশের ঘর থেকে ছুটে এলো—বদনের
সঙ্গে রাত্তিরে বাপের প্রেমালাপ দেখতে।

দামোদর। আচ্ছা—আচ্ছা, সে পরে হবে। তা নাতবৌ, শুনেছ
অশেষের সঙ্গে চপলার—

নীহারিকা। হ্যাঁ, এই মাত্র শুনলাম। তা বেশ হবে, অমন
ছেলে—তা হাতে তো বেশী দিনও নেই, দিন বিশ-পঁচিশ
হবে। কোলকাতায় লোক পাঠান, জিনিস-পত্তর,
গয়নাগাটি—

দামোদর। সেই সব ঠিক কর্তেই তো এলাম। কী কী দিতে
হবে, তুমি আজকালকার মেয়ে, একটা হৃদিস্ দাও দেখি,
রাজেন আর নাটিকে পরশু পাঠবো—আর রাজেনটারও
একটা ঠিক করেছি—বড় অনুগত আমার, খুব খেটেছে
তই ইস্কুলের জন্তে—ঐ অরুর সঙ্গে। ওরে কে আহিস—

(নেপথ্যে—‘আজ্ঞে’)

একবার রাজেনকে ডাক তো।

মানময়ী। নিশ্চয়ই, আমাকে একবারে মা'র মতো দেখে, আর
ঐ চপলার জন্তে তো অস্থির। দিন নেই রাত নেই পেছনে
পেছনে ঘুরছে—এই যে রাজু এসে পড়েছে।

(রাজেনের প্রবেশ)

দামোদর। এই যে রাজু, তোমাকে ডাকতে পাঠাচ্ছিলাম—তা
এসেছ, বসো একটা পরামর্শ আছে।

রাজেন। (বগল থেকে ফাইল নামিয়ে) আজ্ঞে যথার্থ মাষ্টার-
মশাইয়ের সঙ্গে এই ফাইলের কাগজ-পত্রর সূক্ষ্মে একটা
পরামর্শ ছিল—রেজিষ্ট্রারকে সেই চিঠিটার জবাব—

দামোদর। আরে চুলোয় যাক্ তোমার জবাব—এখন এদিকে—
রাজেন। যথার্থ আবার কী হলো ! বদন সরকার, না এই নতুন
মাষ্টার কোন গোলমাল যথার্থ—এই জন্তেই তো—তা বউটা
মরবে কে জানে যথার্থ ! আর একটা বিয়ে করতে নোটিশ
দিন, আর বলুন সজ্জাক থাকতে, এই rule এ ইস্যুলের—
তা নইলে যে রেটে চলছে যথার্থ বিপদ ঘনীভূত—

দামোদর। তাই থাকবে, চপলার সঙ্গে তার বিয়ে ঠিক করেছে—
এই বিয়ে। সজ্জাকই থাকবে, তোমার আইন বজায় থাকলো।
তুমি পরশু নাটীকে নিয়ে কোলকাতায় বাণ্ড বাজার করতে।
রাজেন। (ফাইল পড়ে গেল) যথার্থ যবনিকা। ঠিক জানতাম—
তা যাবো কোলকাতা। (স্বগত) কিন্তু যথার্থ বাবুলাহাটি
আর নয়।

দামোদর। ঠাখ রাজু, তোমাকে আমি ছেলের মতো স্নেহ করি—
রাজেন। আঞ্জে তার প্রমাণ পেলাম। যথার্থ ছেলে হতে
চাইনি। আইনতঃ—ছেলে হলে যথার্থ কাজে দিতো।

দামোদর। আরে রাখো তোমার আইন, আইনই ডোবাবে।
তোমার বিয়েও ঠিক করেছি ঐ অরুর সঙ্গে। তোমার
মা'র মত আছে—তোমার কৰ্ত্তী-মার ইচ্ছে, আমারও—
রাজেন। যথার্থ কোন্ অরু ? যথার্থ সেই চোখ-কটা মেয়েটা—
ওর চোখ দেখলে যথার্থ আমারও চোখ বুজতে ইচ্ছে করে।
মনে হয় যেন একুনি যথার্থ 'ম্যাও' করে উঠবে—না দেখুন,
মেয়েজাতকে আর বিয়ে করবো না—


দামোদর। তুমি থামো। তবে কী পুরুষকে বিয়ে করবে ?
বে-থা করে এখানেই থাক, মোক্তারী ছাড়—ঐ মোক্তারীই
তোমাকে ডুবাচ্ছে। পুরুষকে বিয়ে করতে আইন দিচ্ছে ?
অমত নয়, তাদের আমি কথা দিয়েছি—তোমার দুঃখ
আমি ঘুচিয়ে তবে চোখ বুজবো।

রাজেন। দেখুন যথার্থ আপনিই আমার সব, অবাধ্য হবো না।
তবে ঐ মেয়েমানুষকে বিয়ে করতে—না দেখুন আমি ষাই,
যথার্থ মাথাটা ঘুরছে, যেন যথার্থ নাগরদোলায় চড়েছি।

(ফাইল ফেলেই প্রস্থান)

দামোদর। চলো আমরা ও-ঘরে গিয়ে সব ফর্দি করে ফেলি। ওটা
এখনো নাবালক আছে, নইলে পুরুষ বিয়ে করতে চায়।

(সকলের প্রস্থান)



তৃতীয় অঙ্ক

তৃতীয় দৃশ্য

[রাজেনের শোবার ঘর—সময় সন্ধ্যা, ঘরটি স্বল্পালোকিত ।

রাজেন তার বিছানায় কোলের মধ্যে একটা বালিস

ভুঁজে বসে আছে]

(রাজেনের মা'র প্রবেশ)

রাজুর মা । ছাখ্ ভর সন্ধ্যাবেলা অমন গালে মুখে হাত দিয়ে বসে থাকিস নে—ওহ্ ! একবার বড়-বাড়ী যা দেখি—এই ফর্দটা দিয়ে আয় ! নে—ওহ্—

রাজেন । আবার মা যথার্থ বড়-বাড়ী ! আর যথার্থ কোন্ প্রাণে যাবো ! গেলেই প্রাণটার মধ্যে ছ হ করে ওঠে !—সেই ঘর—সেই দোর—সব ঠিক আছে—শুধু যথার্থ—না মা, তুমি বলো না আমায়—আমি যথার্থ পারবো না ।

রাজুর মা । ছাখ্ অমন করতে নেই—কর্তা তোকে এতো করেন—এই তোর বিয়ের সব খরচ স্বন্ধে নিয়েছেন—নগদটা আমাদের একেবারে লাভ—

রাজেন । বিয়ে ? যথার্থ বলো কী তুমি—? মেয়েজাতকে আর বিয়ে নয়—আমি যথার্থ চিরকুমার থাকবো—যথার্থ ছনিয়াকে—ঐ চপলাকে দেখাবো যে—রাজেন বাড়রী পুরুষ—বিয়ে না করলেও যথার্থ সে সবার বুকের উপর দিয়ে—মা দেখো—চলো যথার্থ সদরে বাই, মোস্তারী করে যা পাবো—

রাজুর মা। আচ্ছা সে তো পরে—ছিঃ বাবা, রাগ করে না।
 তোকে নিয়ে আমি বেঁচে আছি, আগার ছুঃখু—আর পুরুষ
 বিয়ে না করলে কী সৃষ্টি চলে রে পাগল—তুই এলি
 কোথেকে—? আচ্ছা—আমি না হয় গিয়ে ফর্দটা দিয়ে
 আসি—তুই উঠে একটু চা খা দেখি—ঝিকে ব'লে
 গেলাম—

(প্রস্থান)

রাজেন। উঃ—যথার্থ ঠিক জানতাম—এই দাঁড়াবে! সেই
 বিষাদবারের বারবেলায় কর্তা আর একটা ইন্সুলের কথা
 যথার্থ যেই পাড়লেন, তখনি বুঝলাম যথার্থ আমার সব
 গেল। এইবার যথার্থ হারালাম আমার চপলাকে—উঃ
 যথার্থ গ্র্যাজুয়েট না হ'য়ে—আমার মুখের গ্রাস—যথার্থ
 সেই ছোটকাল থেকে তো তো করে যথার্থ তা দিচ্ছি—
 কে—?

(চপলার প্রবেশ)

চপলা। রাজুদা—ঘরে আছেন? ওমাঃ, এই সময়ে এমন করে
 বসে, যেন কতাদায়!

রাজেন। কে চপলা—? মাকে খুজচ?

চপলা। না রাজুদাকে—আছেন তিনি! (হাসি)

রাজেন। উঃ—যথার্থ সেই হাসি—আহা!—না রাজুদা মরেছে!

আজ কেন তাকে যথার্থ?—মাষ্টার বুঝি বাড়ী নেই?

চপলা। (আলোটা একটু বেশী করে' দিল—রাজেনের পাশে বসে তার হাতখানা তুলে নিয়ে) ছিঃ—রাজুদা—আমার ওপর আপনি রাগ করতে পারেন—মেয়েদের ইচ্ছেতে তাদের বিয়ে বাংলাদেশে হয় না—তাতো জানেন? আর অরু—? সে তো আমিই—একসঙ্গে উঠেছি বসেছি—কচুর শাক কাটা—ওলের ডালনা রাঁধা—আমরা হরিহর আত্মা—সে আপনাকে খুব ভালবাসে—

রাজেন। যথার্থ যেন কচুর শাক—না? তার ভালবাসা তো যথার্থ চাইনি—যার চেষ্টায়, সে যথার্থ গ্র্যাজুয়েটের মোহে পড়লো—মেয়েজাত যথার্থ এতো নামের কান্ডাল—আর পেছন পেছন এতোদিন, মোক্তারী-টোক্তারী ছেড়ে দিন-রাত ফাইল বগলে—সে কী যথার্থ ওই কচুর শাক অরুর জন্তে—? তুমি যথার্থ ফিরেও তাকালে না—শেষে জুটিয়ে দিলে একটা যথার্থ ওলের ডালনাকে—? যা কুটতে কষ্ট—খেয়ে যথার্থ বাপ্পে বাপ্প—from start to finish—যথার্থ জ্বালাতে জ্বালাতে যাবে। নাঃ—মেয়েকে বিয়ে আর করবো না! ওদের ওপর ঘৃণা হয়ে গেছে—যথার্থ ওর চেয়ে পাথরও ভাল—আঘাত দিলে একটু কেঁপে ওঠে! না চপল—তুমি যাও, তোমাকে দেখলে আবার যেন যথার্থ প্রাণটার মধ্যে কেমন চন্ চন্ করে ওঠে—এখন তুমি পরজী—যথার্থ একেবারে out and out!

চপলা। (রাজেনের হাতটা বুকে চেপে) ছিঃ রাজুদা, একী

আমার কম দুঃখ—কী করবো,—বাবার মত, বোঝেন ত ?
আপনায় আমি সেই কবে থেকে—

রাজেন। কী যথার্থ ? কবে থেকে কী— ? ভালবাসা ? যথার্থ
একবার বলো যে তুমি আমায় ভালবাস—তাতেই খুসী !
তারপর তুমি যার ইচ্ছে যথার্থ জ্বী হও—বল চপল— !

(তার হাত ছ'খানা চেপে ধরলো)

চপল। (রাজেনের বুকে মাথা রেখে) ওগো—সে কি আজ
নতুন করে তোমায় বলতে হবে—এত দিনেও তুমি বুঝতে
পারোনি ? তুমি যে আমার—

রাজেন। ব্যস্—যথার্থ অল্ রাইট ! আর বলো না, লজ্জা
পাবো—আমি এইটুকুই চাই। যথার্থ রাজেন বাড়রী
বিয়ের কাঙ্গাল নয়—সে তোমার কাঙ্গাল। বলো—তুমি
আমার—বলো ? যথার্থ বুকের মধ্যে কী ভাষা গুনতে
পাচ্ছ ? ওটা পেনাল্ কোর্ড নয়, যথার্থ ওটা মানুষের—
ওখানে মোস্তার, গ্র্যাজুয়েট কোন পার্থক্য নেই। মানুষ,
কুকুর—সব একাকার। ও ভাষা রাজেন বাড়রী—
“মুক্তিয়ার ইন্ দি কোর্ট অব্—” তার নয়—ওটা মানুষ
রাজেনের ! ওটা যথার্থ ইস্কুলে পড়ার কাল থেকেই
মজুত—বলো তুমি আমার—আমি ইয়া বুকের ছাতি
ফুলিয়ে চলি, চপল। আমার—বিয়ে যে ইচ্ছে করুক !
বলো—

চপলা। হ্যাঁ গো হ্যাঁ—আমি তোমারি। সে কী আজ থেকে—
সেই যখন তোমার কাঁধে উঠে আম পাড়তাম—আমি বড়
লজ্জা পাচ্ছি—জানিনে যাও!

রাজেন। আচ্ছা যথার্থ আর বলতে হবে না—লজ্জা আমিও
পাচ্ছি। এখন আমি অরুকে কেন, কচুর শাককেও—
ওলের ডাল্নাকেও—

(দামোদরের প্রবেশ)

দামোদর। কী রাজু! কচুর শাক—ওলের ডাল্না—ও-সব কী
হবে? কাল যাচ্ছ তো কোলকাতায়? নাতীর ওখানে
চলো ফর্দটা ঠিক করে নি।

রাজেন। (উঠে) আজ্ঞে এই—চপলকে ক্ষেপাচ্ছিলাম—যে
তোর বিয়েতে ভোজ দেবো—কচুর শাক আর ওলের
ডাল্না দিয়ে—(প্রণাম করে) তা দেখুন—যথার্থ আমি
মেয়েজাতকেই বিয়ে করবো।

দামোদর। যাক্, বাঁচালে তুমি! চলো এখন—

(সকলের 'প্রস্থান')

যবনিকা



প্রসাদ ভট্টাচার্য্যর
দু'খানি চাঞ্চল্যকর উপন্যাস
— বাস্তবের দু'পৃষ্ঠা —

বাস্তব জগতের নিখুঁত ও নগ্ন চিত্র ! আপনার পারিপার্শ্বিক পৃথিবী
কতো চরিত্রহীন দেখুন । তার পরিচয় সমাধান আনে । বইখানি
প্রকাশিত হবার সঙ্গে সঙ্গে বাংলা-সাহিত্যে ও দেশে তুমুল
আলোচনা এনেছে !

বহুনিন্দিত ও উচ্চ প্রশংসিত ।

— ‘যে ফুল না ফুটিতে’

সম্পূর্ণ নতুন ধরনের উপন্যাস ! চরিত্রহীন কালু ও লিলির অভিনব
পরিণতি । প্রসাদ ভট্টাচার্য্য সাহিত্য-জগতে সম্পূর্ণ নতুন পৃথিবী
সৃষ্টি করেছেন ! বইখানি বাংলা-সাহিত্যে বিক্ষুব্ধ চাঞ্চল্য এনেছে !

— o —

কেদারনাথ বন্দ্যোপাধ্যায়, অধ্যাপক অমূল্যধন মুখোপাধ্যায়, এম্-এ, পি. অর্ড. এ.
Advance, Forward, ভবিষ্যৎ, ইত্যাদি ইত্যাদি উচ্চ প্রশংসা করেছেন ।

—নাট্যনিকেতন—

শুভ উদ্বোধন—কলিকাতা, ২রা নভেম্বর—১৯৩৫

পরিচালক—ব্যাঙ্কাটা থিয়েটার্স

প্রযোজক—শ্রী প্রবোধ জুহু

সঙ্গীত শিক্ষক	}	শ্রীরাধাচরণ ভট্টাচার্য
ও		
হারমোনিয়াম বাদক		

রঙ্গমঞ্চাধ্যক্ষ—শ্রীভূপেন দত্ত

আলোক-শিল্পী—সুধীর বসু ও শৈলেনবাবু

স্মারক—কালিবাবু ও মণিবাবু

—চরিত্র—

মানস—শ্রীশিবকালী চট্টোপাধ্যায় পরে শ্রীভূমেন রায়

দামোদর—শ্রীমণি ঘোষ

রাজেন—শ্রীজীবন গাঙ্গুলী

অশেষ—শ্রী প্রফুল্ল মুখোপাধ্যায়

সুধীর—শ্রীহরিধন মুখোপাধ্যায়

হারু—শ্রীঅমূল্য হালদার

খট্টমট্ট—পবিত্রবাবু

কানাই—শ্রীনিরাপদ শীল

ডাক্তার—শ্রীভূজঙ্গভূষণ দে

নীহারিকা—শ্রীমতী নীহারবালা

মানময়ী—শ্রীমতী চারুশীলা

• চপলা—শ্রীমতী নীরুপমা

রাজুর মা—শ্রীমতী হেমন্তকুমারী

পুনশ্চ !

পুনরায় পুনশ্চের অবতারণা করছি, পুনশ্চ বা ভূমিকা লেখা কোন বইএর প্রথমে আমার নীতি-বিরুদ্ধ, কিন্তু তবুও আমাকে প্রায় লিখতে হয়। ভূমিকা বা পুনশ্চ লেখার উদ্ভিত, আমার মনে হয় যে, যেন লেখক প্রথমই শিক্ষক হ'য়ে দাঁড়িয়ে তাঁর বক্তব্য বুঝিয়ে দিতে চান। সেটা পাঠকের পথ-ভ্রান্তির আশঙ্কা দিতে পারে।

এই নাটক যখন লিখি তখন কোন বিশেষ রঙ্গালয়ের জন্য লিখিনি—লিখেছিলাম লেখার জন্য—প্রকাশকের জন্য। কিন্তু পরে এই নাটকপানি নাট্যনিকেতনে অভিনীত হয়। এবং এই জন্য আমার শ্রেষ্ঠ কৃতজ্ঞতা নাট্যনিকেতনের স্বত্বাধিকারী শ্রদ্ধেয় শ্রী প্রবোধচন্দ্র গুহের কাছে। নাটকপানি তাঁর পুঁজি লাগে এবং তাঁরই ইচ্ছায় এর অভিনয় হয়। আমার আত্মীয়স্বজনিক শ্রীজিতেন্দ্রনাথ গাঙ্গুলী এই অনুষ্ঠানের হোতা ও পুরোহিত। তাঁর সাহায্যেই এই নাটক আত্মপ্রকাশ করে নাট্যনিকেতনের পাদপ্রদীপের সম্মুখে। তাঁর স্বর্ণ এই জীবনে শোধ করতে পারবো না। বন্ধুবর শ্রীশোহনলালের স্বর্ণের কথা উল্লেখ করে' স্বর্ণ আরো বেশী করতে চাই না।

যে সব অভিনেতা ও অভিনেত্রী আমার কল্পনার জীবকে বাস্তবে রূপ দিয়েছেন তাঁদেরকে আমার আন্তরিক অভিনন্দন জানাচ্ছি। তাঁরা আমার ভাবকে ভাষা দিয়েছেন, ভাষাকে মূর্তি দিয়েছেন। এ আমার আশীতীত। প্রথম রাত্রেই যেদিন তাঁরা আমার ভাষা নিয়ে জনতাকে অভিনন্দন করলেন, সেই মুহূর্তেই পাদপ্রদীপের নীচে বসে নীরবে আমার শ্রীতিপূর্ণ নমস্কার জানিয়েছি,—আমার অন্তর নিংড়ান অভিনন্দন।

সুতরাং আমার এই নাটকের অসামান্য সাফল্যের জন্য দায়ী আমার ঐ উল্লিখিত বন্ধুরাই—আমি নই। সমগ্র বাংলার, ভারতের ও ব্রহ্মের বাঙ্গালীর কাছে আমার নাটক উজ্জ্বলিত প্রশংসা পেয়েছে—এই জন্য আমি আশীতীত আনন্দ পেয়েছি। লেখকের এইটুকুই পাথেয়। আমার সাহিত্য-জীবনের এই প্রথম নাটকের এই অসামান্য সাফল্যের যিনি উৎস, আজ তাঁর কথা অশ্রুভরা-ক্রান্ত কণ্ঠে স্মরণ করছি।

প্র. ভ.

ভারতবাসী অগণন উচ্ছ্বসিত প্রশংসাপত্রের মাত্র কয়েকটি প্রকাশিত করিলাম—সবগুলি শীঘ্রই দ্বিতীয় সংস্করণে প্রকাশিত হইবে।—ইতি প্রকাশক।

—*—

গত শনিবার নাট্যনিকেতনে শ্রীযুক্ত প্রসাদ ভট্টাচার্যের মানময়ী বয়েজ স্কুলের উদ্বোধন হইয়াছে। মানময়ী গার্লস্ স্কুলের পরের ঘটনা অবলম্বনে নাটকখানি লিখিত হইয়াছে। * * * অভিনয় খুব উপভোগ্য ও হাসির হইয়াছে। অবশ্য লেখকও কৃতিত্বের দাবী করিতে পারেন। —আনন্দবাণী—

শ্রীযুক্ত প্রসাদ ভট্টাচার্যের নূতন নাটক ‘মানময়ী বয়েজ স্কুল’ নাট্যনিকেতনে দেখান হইতেছে। * * * গল্প এই গ্রহসনে খুব সুন্দর ভাবে চিত্রিত করা হইয়াছে। আখ্যানভাগ বেশ ভাল এবং হাস্যরসপূর্ণ। —দেশ—

* * * —লেখকের শক্তি আছে। এই বয়েজ স্কুল দেখে লোকে হেসেছেন খুব প্রাণ খুলে—। * * * এবং সবচেয়ে আনন্দের বিষয় এই তিন অঙ্কের নাট্যকার টিম্ ওয়ার্ক ভাল হয়েছে। —সোণার বাংলা—

নাট্যনিকেতনে ‘মানময়ী বয়েজ স্কুল’ খোলা হবে দেখে নাটকখানি দেখবার জন্য উদগ্রীব হয়েছিলাম। * * * —একথা আমরা স্বীকার করবো প্রসাদবাবুর লেখায় হাত আছে, গতি আছে। —থেয়ালী—

স্বর্গীয় রবীন্দ্র মৈত্রের মানময়ী গার্লস্ স্কুলের প্রধান প্রধান সব চরিত্র এনে নতুন সিঁচুয়েসনে নতুন রস দিয়ে জমিয়ে তোলা বড় সহজ কাজ নয়। লেখক (প্রসাদবাবু) এই শক্ত কাজেও সফল হয়েছেন। লোক হেসে গড়িয়ে পড়লেই এই সব নাটকে উদ্দেশ্য সিদ্ধ হয়। ‘মানময়ী বয়েজ স্কুল’ এই দিক দিয়ে সফল হয়েছে। হাসির প্রচুর উপাদান সামনে ধরে দর্শকদের খুসী করেছে। যারা অভিনয় দেখতে গিয়ে কান্ডিতে প্রস্তুত নন, তাঁরা মানময়ী বয়েজ স্কুল দেখে নিশ্চিতই খুসী হ’য়ে ফিরবেন। —ঘরে-বাইরে—

গ্রহসন উপভোগ্য। * * * নাট্যপ্রিয়গণের ইহা সুন্দর পোষাক।—কুরুক্ষেত্র—

নাট্যকার প্রশংসা দাবী করেন—। * * * সেটি হচ্ছে বিষয়বস্তুর বীধুনি।

—বাতায়ন—

লোকে হেসেছেন—সত্যিকারের রসের আশ্বাদনও পাওয়া গেছে। রাজুর ভূমিকায় জীবন গাঙ্গুলী চমৎকার অভিনয় করেছেন। নোহারবালা ভাল অভিনয় করেছেন ও গেয়েছেন প্রতিমধুর ভাবে। —স্বদেশ—

নাট্যনিকেতনে ‘মানময়ী বয়েজ স্কুল’ অভিনীত হচ্ছে। অভিনয় উৎরে গেছে বেশ। ভালো অভিনয় করে দর্শকদের খুসী করেছেন। সুখবর সন্দেহ নেই।

—নাট্যগর—

